

# WAKITÀ ANA AZLATATAK UWANA YESU AFƏTÀLA À YUHANA À AMA ALA Apocalypse

*Azlatatak uwana Yesu afətala à Yuhana à ama ala*

<sup>1</sup> Aganay uwana Yesu Kristu afətàla à azlamayà anja Zəzagəla la kəl ala. “Iyay, fətàlla ama ala Zəzagəla”, agòdal, kà atà anja masəlay uwana adàpaka vok la huma la gay. Kà uwaga Yesu Kristu asləl à waŋ malika anja à slaka mayà anja Yuhana, kà mapəhalla azlatatak uwaga. <sup>2</sup> Kiya uwaga Yuhana azàŋ la huma azladza gesina uwana anəŋàŋ, agòd la magəđəŋ à afik, ndzer uwaga kà gay anja Zəzagəla, ŋgaha babay kà baməraka Yesu kà agəđàŋ à afik, kà uwaga kà dziriga. <sup>3</sup> Mapis gay à vok agay la azladza, uwana tadzeŋ wakità uwanay la huma azladza la kuda zlökkà, azlagay uwanay kà atsà à waŋ kà la paŋaw anja Zəzagəla la awtày, kà anja azladza uwana tatsəb sləm à azlagay uwanay, ŋgaha takəs kà, Zəzagəla adàpis à atà gay à vok. Haday kà, kaslà uwana azlatatak uwanay adàpaka vok kà, adàgay nekwa nekwa.

*Madàh ‘Ayyi’ anja Yuhana,*

*uwana adahàŋ à azlaməna gay Zəzagəla slaslaka məđəf*

<sup>4</sup> Gi Yuhana, la uwana gətsetser à akul wakità, ‘Ayyi’ gəgodf à akul, akul maham à ahəŋ məna gay Zəzagəla slaslaka mədfəf, uwaga la kutso aŋa Asəya la abà.

Zəzagəla apisakulla gay à vok, ŋgaha adzala akul à ahəŋ la lapiya la abà. Masla uwana agà la sifa dagay uwarà, mok uwana gudəŋ à vok gesina la ahəŋ dadəŋ aw, ŋgaha lakana aga la ahəŋ la sifa aya, ŋgaha adàsa à waŋ à gudəŋ à vok. Azlamasasədfok mədfəf tapis à akul gay à vok, ŋgaha tadzala akul à ahəŋ la lapiya la abà. Azlamasasədfok mədfəf uwaga tadza à ahəŋ la huma kursi aŋa Zəzagəla, tapis à akul gay à vok. <sup>5</sup> Yesu Kristu masla sayda dziriga, apis à akul gay à vok la mav à akul lapiya. Masla la uwana teraŋa aŋa mawul à uda la tataka azlamazimnekid la abà, ŋgaha masla Sufəl aŋa azlasufəl aŋa gudəŋ à vok gesina.

Yesu uwaga awoya anu, aməts kà aŋami, kikay kà aŋiz aŋha, ndzədfa aŋa tsakana lakəl gami aya aw, atəfà anu.\* <sup>6</sup> Masla mapakanula kà tsəhay aŋha, kà uwana masla Sufəl gà gà. Masla adahəŋ kiya uwanay, kà anu aŋa magay azlaməna makad tatak babay, kà mazlak Zəzagəla Baba aŋha, dza atəm à ahəŋ aŋa mazləbay aw, zləbàw masla gesina. Maslay atsa à waŋ kà la slaka aŋha koksikoksi. Amen.\*

<sup>7</sup> Nəŋəwwəŋ aganay atsa à ahəŋ la habaga la abà. Yewdi aŋa azladza gesina adənəŋəŋ baməraka azlauwana tatsàh la atsəkədf babay. Azladza gesina tadàtsah hulolo, kà uwana guba

---

\* **1:5** 1.5 Mahabay 89.27; Yesayya 55.4    \* **1:6** 1.6 2Musa 19.6

adàza atà, kà uwana taweskà masla. Ndzer. Amen.✠

<sup>8</sup> Sufəl Zəzagəla agòd:

'Gi la uwana Alfa, ngaha gi la uwana Omega.'✠  
(Uwana asal magodəy kà: Gi la uwana gi matera aña tatak gesina, ngaha gi la uwana makədf gəl à ahəŋ aña tatak gesina aya)

Masla la maslay gesina la ahəl. Aga la sifa dagay uwarà, mok uwana gudəŋ à vok la ahəŋ dadəŋ aw, lakana aga la ahəŋ la sifa, ngaha adàsa à waŋ à gudəŋ à vok hadəy.

*Kristu apəhla vok à Yuhana*

<sup>9</sup> Gi Yuhana, deda aŋkul la uwana gətsəter wakità uwanay. Anina gesina gami mədahama gay à vok la Yesu la abà. Kiya uwaga məhama à ngərpa uwaga à abà, ngaha à makoray aŋha, uwana à abà məbasəŋ gami. Kà aña gulo tekedika tadùw à matəkukurùh uwana à afik, la tataka dərəv la abà, uwana sləm aŋha Patmos, kà uwana gəpəh gay Zəzagəla la magədfəŋ à afik kà Yesu la uwana dziriga, gəgòd. <sup>10</sup> La vudf ladu anik Masasədfok Zəzagəla akəs gi, ngaha gətsənəŋ kuda la lig gulo la ndzəda, bokuba matsənay aña mazlazliŋ. <sup>11</sup> Uwana agòd: “Uwana kanəŋəŋ la uwana katsetser à wakità à abà, sləl à slaka maham à ahəŋ məna gay Zəzagəla slaslaka mədfəf uwana la Efesus, la Səmirna, la Pergam, la Tiyatir, la Sardəs, la Filadelfiya, ngaha la Lawodikiya”, agòd à gi. <sup>12</sup> Mok uwana gətsənəŋ, kiya uwaga gəgòlà

✠ **1:7** 1.7 Daniyel 7.13; Mata 24.30 ✠ **1:8** 1.8 2Musa 3.14

vok kà manəḅəḅ dza uwana avàts à gi gay uwaga, ḅgaha gənəḅəḅ fənəs slaslaka mədəf uwana madəhəḅḅga la luwàluwà. <sup>13</sup> La tataka aḅatà la abà gənəḅəḅ maftsa à vok aḅa dza babay. Masla la lukut zinziḅga la vok, tsərəh à dagaḅaga, mawad vok ala gà la gay ləv la gabaga luwàluwà. <sup>14</sup> Aḅidz aḅha kà, medəkuga sayya, bokuba slewzi. Yewdi aḅha awutsədəfay bokuba aləh akəl. <sup>15</sup> Asik aḅha wutswawuts bokuba ada vərəzaniga, uwana taf akəl à abà, kuda aḅha kalkal la mahohumay aḅa iyaw uwana la mukwà la afik. <sup>16</sup> Tsetsiliḅ mədəf la ahəl kaf aḅha, katsakar mazuwayga gay səla nna, asà à waḅ la gay aḅha la awtəy. Hud adi aḅha ḅərəzl à adi bokuba afats aḅa tataka afats. <sup>17</sup> Kay, mok uwana gənəḅəḅ, gətəd à makəla asik aḅha bokuba gi mamətsay gà. Ama la lig la ahəḅ abək gi ahəl kaf aḅha à gəl, agòḅ à gi: “Guba akəs ka aw. Gi uwana gəga la ahəḅ dagay uwarà, ḅgaha gi uwana gədəgay la ahəḅ aya. <sup>18</sup> Gi, gi uwana la sifa. Gəmèts ama gədza à ahəḅ la sifa aḅa tsərəh à awtəy. Gi la ndzəḅa lakəl aḅa mamətsay, ḅgaha gi la tsəkurəm aḅa slaka uwana azlamazimnekid tadza à ahəḅ aya. <sup>19</sup> Kiya uwaga kà uwana kanəḅəḅ lagonay la uwana adəpaka vok bawbaw gesina kà: Tsetsèr! <sup>20</sup> ḅgaha lakəl aḅa azlatsetsiliḅ mədəf uwana kanəḅəḅ la ahəl kaf gulo, ḅgaha la azlafənəs mədəf uwana madəhəḅ gà la luwàluwà kà, gəpəhakalla godega aḅa azlatatak uwaga. Godega aḅa azlatsetsiliḅ mədəf kà apəhla ala azlamalika mədəf uwana Zəzagəla abək atà à azlaskala mədəf aḅa maham à

ahəŋ məna gay Zəzagəla. Azlafənəs mədəf uwanay apəhla ala azlamaham à ahəŋ məna gay Zəzagəla uwatà aya pəra”, masla agòd.

## 2

### *Wakità uwana Yesu atsetsèr à azla Efesus*

<sup>1</sup> Yesu agòd: “Tsetsèr gay uwanay à malika, uwana anəŋla məna madiŋal gəl à vok la Efesus. Aganay gay aŋa dza uwana la tsetsiliŋ mədəf la ahəl kaf aŋha, akəsiŋ, ŋgaha uwana auguzahay la tataka aŋa azlafənəs mədəf uwaga la abà. <sup>2</sup> Gəsəl sləray aŋak uwana kadahəŋ gesina, kabasəŋ ŋgərpa uwaga. Kavà tetəvi à azlaməna makəsafər aŋa matapakala azlatatak aw. Azladza uwana tagodəy: ‘Anu azlaməna masləl anu à waŋ gə aŋa Yesu’, tagòd, tekedika azlaaŋulo aw, gür atà, kabəza atà à tsəh kà azlaməna fida. <sup>3</sup> Kà gi à uwana kabasəŋ ŋgərpa, ŋgaha kasakawal à tsəh ala aw. <sup>4</sup> Ama gi la gay lakəl aŋak, kà uwana kawoya gi bokuba uwana uwarà aya aw. <sup>5</sup> Dzùgw slaka uwana katəd à ahəŋ, pəh gay la ləv ala, dzà à ahəŋ aya bokuba madz à ahəŋ aŋak uwana uwarà, tsa baŋa kiya uwaga aw, kà gədàda à awtəy, ŋgaha gədawula fənəs aŋak à tsəh. <sup>6</sup> Ama la ahəl anik kadahà delga, kà uwana kakweskà uwana azla Nikolayya tafəhəŋ bokuba uwana gəkweskà suwaŋ. <sup>7</sup> Kəla dza uwana sləm lakəl, atsəb sləm à uwana Masasədok Zəzagəla apəhay à maham à ahəŋ məna gay Zəzagəla. Azlauwana taguwà à uda la abà la makədaslay kiya uwanay, gədàvə à atà tetəvi kà mazuw mayyay aŋa ahəf

uwana la gày alàl aña Zəzagəla la abà uwana avà sifa à azladza”, Yesu agòd.✧

*Wakità uwana Yesu atsetser à azla Səmirna*

<sup>8</sup> Yesu agòd aya: “Bà gotənaŋ tsetsèr gay uwanay à malika uwana anəŋla azlaməna madiŋal gəl à vok la Səmirna. Aganay gay aña dza uwana agà la ahəŋ dagay uwarà, ŋgaha masla adəgay la ahəŋ aya. Aməts, ŋgaha awulà à uda la mamətsay.✧ <sup>9</sup> Gəsəl matərəbay uwana katərəbay, gəsəl kà kak masla kudfa aña gudəŋ à vok. Ama la slaka gulo kà kak gorobu. Gəsəl mawisiga uwana azladza tapəh à kak à vok babay. Məna mapəh à ka uwaga à vok kà: ‘Anu azla Yahudiya’, tagod. Ama tsa, azla Yahudiya kà aña gay gə pəra, maham à ahəŋ aŋatà kà aña seteni. <sup>10</sup> Guba akəs ka, kà ŋgərpa uwana kadàsay la huma aw. Səl kà, seteni adədaw azlaanik aŋkul à daŋay la tataka aŋkul la abà kà magur akul, ŋgərpa uwaga kà kadàsaw aña mahənay kulo. Baməraka tafa akul makits à kuda babay, kabasawwan pəra. Kiya uwaga gədàvə à akul sifa adəv à gay aw, bokuba masik aŋkul. <sup>11</sup> Kəla dza uwana la sləm lakəl, atsəb sləm à uwana Masasədok Zəzagəla apəhay à maham à ahəŋ məna gay Zəzagləa, azlauwana taguwà à uda la abà, la makədaslay, kiya uwanay mamətsay masəla adətəd atà à gəl aya aw”, Kristu agòd.

*Wakità uwana Yesu atsetsèr à azla Pergam*

---

✧ **2:7** 2.7 1Musa 19.1-24 ✧ **2:8** 2.8 Yesayya 44.6

12 Yesu agòdf aya: “Bà gotənanj tsetsèr gay uwanay à malika uwana anənjla azlaməna madijal gəl à vok la Pergam. Aganay gay aña dza uwana akor katsakar mazuwayga, gay səla nna. 13 Gəsəl gudənj uwana kadza à ahənj la abà, uwaga makoray aña seteni. Ama la kaslà uwana azladza takədf magamza gulo dziriga gə Antipas kà, kabèdfəla gay aw, kawaslàhà gi à ahənj la madijal gəl à vok la abà, takədf masla à gudənj ankul à abà, kay kà, kak kadfàh sayda gulo la dazuwaya, kà gi Sufəl anjak. 14 Gəfahà à ka akur à lig babay. Ama azlatatak anik la ahənj la tataka anjak la abà uwana asà à atà manəf matapla aña Balam, uwana atapla à Balak uwana aparətla azla Isərayel, kà mapad azlasləb matulay, ŋgaha kà atà aña madfàh mabila aya babay. 15 Kiya uwaga babay azlaanik la tataka anjak la abà, tadehəhənj bokuba azlauwana tanəfa matapla aña azla Nikolayya. 16 Tsa baña kità kà, pəh gay la ləv ala. Awkà, gədà à awtày à slaka anjak, gəp guvəl la azladza uwaga la katsakar uwana atsa à wanj la gay gulo la awtày. 17 Kəla dza uwana sləm lakəl, atsəb sləm à uwana Masasədfok Zəzagəla apəhay à maham à ahənj məna gay Zəzagəla. La azlauwana taguwà à uda la abà la makədfaslay, kiya uwaga gədàtsəkla kaf, uwana asà à ahənj la zagəla uwana azladza tasəl aw. Gədàvəha à atà babay akur medfekuga uwana matsetseral sləm mawga à vok gə. Dza la ahənj asəl sləm uwatà aw, say dza uwana abəzal uwaga pəra”, Yesu agòdf.✧

---

✧ 2:17 2.17 2Musa 16.14-15

### *Wakità uwana Yesu atsetsèr à azla Tiyatir*

18 Yesu agòd̄f aya: “Bà gotənan̄ tsetsèr gay uwanay à malika uwana anəŋla azlaməna madiŋal gəl à vok la Tiyatir. Aganay gay aŋa Kona aŋa Zəzagəla. Yewdi aŋha kà awutsəd̄fay bokuba alàh akàl, azlaasik aŋha tawutsəd̄fay wutswawuts bokuba ada vərzezaniga. 19 Gəsəl uwana kadfehəŋ. Gəsəl kà kawoya azladedə aŋak, ŋgaha la mad à huma à gay, uwana kadiŋ gi gəl à vok, ŋgaha la mabasiŋ aŋak la sləray la abà, ŋgaha la masal aŋak aya. Gəsəl kà uwana kadfehəŋ la uwaga kà, d̄fad̄uwa la uwana kad̄fahəŋ uwarà. 20 Ama gi la gay lakəl aŋak: Mis uwaga la tataka aŋkul, sləm aŋha Yezabel kà, avavara ka aw. Masla agod̄fah kà: ‘Gi masla mapəhal gay ahəl aŋa Zəzagəla’, agod̄f, ŋgaha kavəl tetəvi kà madz à ahəŋ la slaka aŋak aw. Masla la uwaga ataplə fida à azlamayà gulo, kà atà aŋa masokw à mabila à abà, la mapad̄ah sləb matulay. 21 Gəd̄akəd̄əval kaslā à ahəŋ, kà masla aŋa mapəh gay la ləv ala; ama adà à huma à gay kà la mad̄fah mabila aŋha pəra. 22 Kiya uwaga kà, gəd̄aməlal gəl à kəslah à afik la d̄uvats, adàsa ŋgərpa. Azlaməna matsatsəlāh vok atà nna tadàsa ŋgərpa babay, say baŋa atà tapəh gay la ləv ala, ŋgaha la masakal à tsəh ala sləray aŋa mis uwaga gesina bay aya. 23 Ŋgaha aya bay kà, kəla dza uwana abəzal masik aŋa sləray aŋha, uwana ad̄fahəŋ. Gəd̄akad̄f azlabəza aŋha, kà maham à ahəŋ məna gay Zəzagəla aŋa masəlay, kà gi la uwana gənərəz madzugway aresl aŋa azladza, ŋgaha la uwana tatuwal à tsəh gesina.



<sup>24</sup> Lakəl aña azlauwana la gudəŋ Tiyatir uwana tanəfà matapla aña mis uwanay aw, tasəl uwana azladza tazalalla godega nasiri aña seteni aw. Gay la ahəŋ lakəl aña tətə aw. <sup>25</sup> Ama gəḏəwanə à afik kà, say uwana gətəpakulla pəra, tsərəh à kaslā uwana gədəwul à wanə. <sup>26</sup> Azlauwana taguwà à uda la abà la makəḏaslay, ŋgaha uwana takəs gay gulo tsərəh à makəḏ gəl à ahəŋ, kiya uwaga gədəpakatàla kà azlasufəl lakəl aña azlatsəhay gesina uwana tasəl gi aw. <sup>27</sup> Maslay uwana gədəvə à atà kà, uwana Baba gulo avà à gi babay. Tadəgahay azlasufəl dzaŋdzanğa, azlaməna madəh mawisiga kà tadədzamahatàla bokuba dza uwana adəḏ masik à gəl dōhdoh.✧

<sup>28</sup> A azladza uwaga gədəvə à atà aya ŋuzla bebəŋ. <sup>29</sup> Kəla dza uwana sləm lakəl, atsəḏ sləm à uwana Masasəḏok Zəzagəla apəhay à maham à ahəŋ mənə gay Zəzagəla”, Sufəl gami agəḏ.

### 3

#### *Wakità uwana Yesu atsetsèr à azla Sardəs*

<sup>1</sup> Yesu agəḏ aya: “Aya gotənanə tsetsèr gay uwanay à malika uwana anəŋla mənə madiŋal gəl à vok la Sardəs. Aganay gay aña dza uwana la Masasəḏok Zəzagəla məḏəḏ, ŋgaha la tsetsiliŋ məḏəḏ la ahəl bay. Gəsəl madəhəŋ aña k, ŋgaha azladza tadzugway kà: ‘Kak la sifa’, tagəḏ, tsa kak mamətsayga. <sup>2</sup> Tsənàla, wəḏ vok à uda, tsa baŋa kiya uwaga aw, kadəmətsay tsokwfasl, kà uwana gənəŋəŋ sləray aña kà adəhenla la yewdi aña Zəzagəla dadəŋ aw. <sup>3</sup> Iyay awula à

✧ **2:27** 2.27 Mahabay 2.8-9

kak à gəl, uwana katàpla uwarà, la uwana kadà à abà, kapəh gay la ləv ala, ngaha kakəs gay gulo. Baŋa katsənla aw kà, gədàda à awtày la gurùh, la kokudà masəlay aŋak bokuba masla à gəl. <sup>4</sup> Ama tekefika azlaanik la ahəŋ la slaka aŋkul la Sardəs, uwana tadfàh àlành à lukut aŋatà à vok aw, bokuba magodfay azlasətaka la ləv aŋatà la tsəh. Atà azladza uwaga kà, tadàduw à vok lukut medfekuga, anina mədàday la slaka gà, kà uwana azlayla atà. <sup>5</sup> Azlauwana taguwà à uda la abà la makəfaslay kiya uwanay, gədàtsokwah atà à lukut medfekuga à abà, gədàwis sləm aŋatà ala la wakità aŋa sifa la abà tetuw aw, la mok uwana gədàgay la huma aŋa Baba gulo la azlamalika aŋha. La dazuwaya gədàpəhay kà, azladza uwanay kà gədàgodfay ndzer kà: Azlaaŋulo.✧ <sup>6</sup> Kəla dza uwana sləm lakəl, atsəb sləm à uwana Masasəfok Zəzagəla apəhay à maham à ahəŋ mənə gay Zəzagəla”, Yesu agòd.

*Wakità uwana Yesu atsetsèr à azla Filadelfiya*

<sup>7</sup> Yesu agòd aya: “Aya bà gotənaŋ tsetsèr gay uwanay à malika uwana anəŋla mənə madiŋal gəl à vok la Filadelfiya. Aganay gay aŋa dza uwana asa à waŋ la slaka Zəzagəla, ngaha masla dziriga. Tsəkurəm aŋa madla à makoray aŋa sufəl David la ahəl aŋha. Baŋa gi gədapəzl gamagày, dza aslala vok aŋa matsakalla à ama aya aw, ngaha aya, baŋa gi gədatsak à gamagày à ama dza aslala vok aŋa mapəzllay aya aw.✧ <sup>8</sup> Gəsəl madəhəŋ aŋak. Gəsəl kà kak la ahəŋ

✧ **3:5** 3.5 2Musa 32.32-35; Mahabay 69.28 ✧ **3:7** 3.7 Yesayya 22.22

la ndzəda aw. Tekedfika kakəs gi gay la ahəl ala la dazuwaya, kà kak aṅulo. Nəṅəṅ gədəpəzl gamagày kà kak, dza la ahəṅ aslala vok kà matsakal à ama aw. <sup>9</sup> Tsəbal sləm aganay uwana gədàdehəṅ la maham à ahəṅ dza aṅa seteni: ‘Anu azla Yahudiya’, tagòd, tsa azla Yahudiya kà aṅa gay gə pəra. Gədabay atà à waṅ, kà atà makədeɸ à ka à ahəṅ. Kiya uwaga tadəsəlay kà gəwoya ka.✧ <sup>10</sup> Kak kafà sləm à gay gulo! Kabasaṅ, kà uwaga gi babay gədàfa à ka sləm, kà kak aṅa madàdiya à matərəḃay uwana à abà, adàsiya azladza gudəṅ à vok à gəl gesina aw. <sup>11</sup> La katskats gədàwula à waṅ. Tsizllàw à afik la makəsəṅ uwana kabəzal, kà dza aṅa mazəḃ masik aṅa maduwiṅ aṅak aw. <sup>12</sup> Azlauwana taguwà à uda la abà la makədaslay kiya uwanay kà, gədàbək atà à ahəṅ, bokuba azlamaṅuləv la gày aṅa Zəzagəla gulo la aku. Tatak la ahəṅ adàkudək atà la uda aya aw. Gi, gədətsetser à atà sləm aṅa Zəzagəla gulo à vok, la sləm aṅa gudəṅ aṅa Zəzagəla gulo, gudəṅ uwaga kà Urusalima mawga, uwana Zəzagəla adàsləl à ahəṅ la zagəla. Gi la gəl gulo gədətsetser sləm gulo mawga à azladza uwaga à vok babay. <sup>13</sup> Kəla dza uwana sləm la kəl, atsəḃ sləm à uwana Masasəɸok Zəzagəla apəhay à maham à ahəṅ mənə gay Zəzagəla”, agòd.

*Wakità uwana Yesu atsetsèr à azla Lawodikiya*

<sup>14</sup> Yesu agòd aya: “Bà gotənaṅ aya, tsetsèr gay uwanay à malika uwana anəṅla mənə madiṅal gəl à vok la Lawodikiya. Aganay gay aṅa dza

✧ **3:9** 3.9 Yesayya 49.23; 60.14

uwana sləm aṅha: Amen. Masla sayda dziriga, fida atsa à waṅ la gay aṅha aw. La ahàl aṅha la uwana Zəzagəla adfahà tatak gesina.✧ <sup>15</sup> Gəsəl sləray aṅak: Uwala kak iyaw akàl akàl magay aw, uwala kak iyaw matesl gà aw. Njələm kaga tekula aṅatà. <sup>16</sup> Ama bokuba uwana kak la tataka gà la abà kiya uwanay kà, gi gədàkəsl ka à vədah, puway. <sup>17</sup> 'Gi gorobu, gəkor tatak, gədahama gay à gorobu gulo à vok, gənəkudà aṅa tatak aya aw!', kagod. Tsa tekefika, kak masla kudà uwana vok ahamay, kak la diga, kokudà lukut, kak guləf bay. <sup>18</sup> Dèv gi kudà, kà gi aṅa mataf à ka gay à ahəṅ, sùkw luwàluwà mawutsədfayga la slaka gulo, kà kak aṅa magay gorobu. Sùkw babay lukut medekuga, kà kak aṅa matsokw à abà, ṅgaha kà kak aṅa mahadla ziruwì aṅak à ahəṅ. Bə gotənaṅ sùkw aya yohof yewdi la slaka gulo, kadəf à adi, kà kak aṅa manəṅla lela. <sup>19</sup> Hadfay ndzer kà, baṅa gəwoya dza kà, bə masla la uwana gəslahala vok, ṅgaha gətsetsehəṅla. Tsa baṅa kiya uwanay kà, pəh gay la ləv ala, kapaka bokuba iyaw matesl gà aw.✧ <sup>20</sup> Tsəbal sləm, gi la uwaga gədatsizl à gay gamagəy gəzalahay. Dza uwana atsəna mazalahay gulo, apəzl gi gamagəy, gədàda à gəy à slaka aṅha, ṅgaha mədəzuw tatak may anu səla. <sup>21</sup> Azlauwana tadəguwa à uda la abà la makəfaslay, kiya uwanay gədàvə à atə tetəvi kà mas à waṅ aṅa madədzah madzay la kursi gulo la afik, bokuba uwana gəguwa à uda la abà la makəfaslay, ṅgaha gədəmadzay la Baba gulo la

---

✧ **3:14** 3.14 Haṅkəli 8.22 ✧ **3:19** 3.19 Haṅkəli 3.12

kursi anha la afik. <sup>22</sup> Kəla dza uwana sləm lakəl, atsəb sləm à uwana Masasəđok Zəzagəla apəhay à maham à ahəŋ məna gay Zəzagəla”, Sufəl Yesu agòđ.

## 4

### *Kursi anja Sufəl Zəzagəla*

<sup>1</sup> Mok uwana gay uwanay akəđ gəl à ahəŋ, la lig la ahəŋ, gənəŋəŋ aya gamagəy mapəzl vok gə la zagəla. Gətsənà kuda anja dza uwana avàts à gi gay uwarà aya, kuda uwaga la uwana atsən bokuba matsənay anja mazlazliŋ. Dza uwatà agòđ à gi: “Sà à afik à abanay, kà gi anja mapəhakala uwana adàsa à waŋ la huma la gay.” <sup>2</sup> Katskats Masasəđok Zəzagəla akəs gi, ŋgaha gənəŋà kursi Sufəl la zagəla la afik, dza ndzəđaffa la afik. <sup>3</sup> Mahəđay aya anja dza uwatà la afik aw. Huf adi anha kà awutsəđay, bokuba akur kuyah kuyahga, uwana tazalalla yaspe atà la saruwan, kursi uwatà makəsal gay à adi gə la agəla makozakoz dikəts, azlaagəla makozakoz uwatà tawutsəđay bokuba azlaakur uwaga babay.✧ <sup>4</sup> Kursi anik dzik səla gəl anha ufađ uwatà la afik azlamadzahaga tadzàh madzay la afik dikəts tatsòkwàh kà azlalukut međekuga à abà, garamusa aga atà lakəl, azla-garamusa uwatà kà madəhəŋ ga la luwàluwà. <sup>5</sup> La kursi sufəl uwatà la afik la tataka la abà kà, mawutsəđay la maslàh məlo anja habaga asà à uda la abà aya. Aga la ahəŋ la abatà babay azlaakəl mavats à ahəŋ gə məđəf taudəy

✧ 4:3 4.3 Hezəkiyel 1.26-28; 10.1

la huma kursi. Azlaakàl mavats à ahəŋ gà mədəf uwaga kà, apəhla ala kà azla Masasədfok mədəf uwana tadza à ahəŋ la huma Zəzagəla. <sup>6</sup>Tatak anik la ahəŋ la huma kursi aya, masla aga bokuba takenedeka uwana dzəraŋ dzadzəraŋ.

Aga la ahəŋ azlatatak ufaď uwana taduw kursi à tataka à abà. Atà la sifa, huma la lig aŋatà kà bà yewdi, yewdi gesina. <sup>7</sup>Maftsa vok aŋa matera kà bokuba sikalaveri, masəla kà bokuba kokur kaslaga, mamakər kà, huď adi aŋha kà bokuba dza, ŋgaha maufaď, kà zulo uwana ahoyay kagoday. <sup>8</sup>Atà ufaď nna kà, atà la gogozläh mukwa mukwa. Vok gesina kà, bà yewdi, yewdi tsatsabasla huďga la uda gà, takəs gay kà mahabay aw. Vəď la afats bà mahamay tahabay. Tagodf:

'Kak Sufəl Zəzagəla, kak la maslay gesina tsi-kasla, kak tekula.

Kak la ahəŋ la sifa à mok uwana gudəŋ à vok la ahəŋ dadàŋ aw. Lakana kak la ahəŋ la sifa aya, ŋgaha kadàsa à waŋ à gudəŋ à vok.'

<sup>9</sup>Kiya uwaga azlatatak ufaď uwaga la sifa tahaba à dza madza madzayga uwaga la kursi Sufəl la afik, masla uwana adzà à ahəŋ aŋa tsərah à awtày, mazləbay, la maslay, la kikay agay la masla. <sup>10</sup>Bà kəla uwana tadfehəŋ kiya uwaga kà, azlamadzahaga dzik səla gəl aŋha ufaď uwaga kà, takədedf à ahəŋ la huma Zəzagəla, uwana madza madzayga la kursi Sufəl la afik, ŋgaha masla uwana la sifa aŋa koksikoksi, atà tazləba masla, tahaläh garamusa lakəl ala, tabakàh à vəďah la huma aŋha. <sup>11</sup>Tagodf: 'Hadfay, kak

Sufəl Zəzagəla gami. Kak uwana kadfahà tatak gesina, kà uwana asà à ka, à uwana kadfahà à atà, ngaha atà la ahəŋ lagwa. Ka uwaga à uwana, kaslà kà, kəla uwabeyuwi aŋa mazləb ka, la masləkaw ka, ngaha la makəs mapəhay aŋak babay.'

## 5

### *Gay aŋa wakità la magadzaw*

<sup>1</sup> Ngaha gənəŋà wakità makəlbaga la ahəl aŋa dza uwatà la kursi Sufəl la afik. Masla adakəsay la ahəl kaf. Wakità uwatà matsetseray gə gay səla nna. Madfahalla masəlay à vok gə slaslaka mədəf, kà dza aŋa mapəzlay aw.

<sup>2</sup> La lig la ahəŋ gənəŋà məŋ malika uwana anavà la kuda zləkkà: “Uwa à uwana azlayla kà mafətal masəlay uwanay la vok ala uwa? Ngaha mapəzlay wakità uwanay uwa?”, agòd.

<sup>3</sup> Dza la ahəŋ azlayla aw, adàgay dza uwana la vədah adàgay la zagəla, adàgay la tsəh iyaw, adàguwan mali bay kà, taslala vok aŋa mapəzl wakità uwanay, ngaha aŋa manərəz huđ aŋha aw.

<sup>4</sup> Kà uwana dza la ahəŋ azlayla aŋa mapəzlay, à kà manərəz huđ gə gə aw, gətùw mənğa, kà uwatà.

<sup>5</sup> Kiya uwaga tekula la tataka azlamadzahaga uwaga la abà agòd à gi: “Katuw aw, aganay dza uwana bokuba sikalaveri, uwana asa à uda la tsəhay aŋa Yahuda la abà, masla mayyi à tsəh ala aŋa sufəl David, masla akədàslla tatak gesina la maduwəŋ. Masla adàfətalla vok ala masəlay

uwaga, ngaha adàpəlz wakità uwaga”, agòd à gi.

<sup>6</sup> La mapəh uwaga la gay ala kà, gənəjà dza la slaka matsizlla ala dzawwa la tataka azlakursi la abà. Azlamadzahaga la azlatatak ufad uwaga la sifa, takəsalla gay à adi. Maftsa à vok anha kà bokuba magadzaw, la yewdi gulo kà bokuba takəday uwarà. Dzadzukwa dərəw mədəf lakəl, ngaha yewdi mədəf la vok babay. Azlayewdi uwaga kà azla Masasədok mədəf uwana tadza à ahəŋ la huma Zəzagəla, uwana Zəzagəla aslala atà gesina à gudəŋ à vok.

<sup>7</sup> Kiya uwaga magadzaw uwaga azà à vok à awtəy, azəb wakità la ahəl kaf anja masla madza madzayga uwaga, la kursi Sufəl la afik. <sup>8</sup> Mok uwana adazəbay kà, azlatatak ufad uwaga la sifa, ngaha la azlamadzahaga dzik səla gəl anha ufad uwaga takədèdɛf à ahəŋ gesina anətà, niziŋ agà atà la ahəl gesina, kəla uwabeyuwi anətà azlata sə dewni la ahəl anətà, mahənlaga la kidzidzi. Uwaga apəhla ala kà madəv kudfa anja azlaməna gay Zəzagəla.✧ <sup>9</sup> Atà tahəb mahabay mawga. Tagòd:

'Kak azlayla kà anja mazəb wakità uwanay anja mapəzlay,

kà uwana takədɛf ka, ngaha kapəzl gəl à azladza à ahəŋ.

La aniz gəl anək kà awùlla atà à slaka Zəzagəla.

Azladza uwaga tasà à uda la azlatsəhay la azlagay anik anik gesina.

---

✧ 5:8 5.8 Mahabay 141.2



Ŋgaha tasà à waŋ la makəf gəl à ahəŋ  
gudəŋ à vok gesina.

<sup>10</sup> Kak kapàkatàla, kà azlatsəhay aŋak, kà  
uwana kak, Sufəl gà gà.

Kadfaŋ kiya uwanay, kà mapakatàla kà  
azlaməna makaf tatak à Zəzagəla gami.

Atà tadəgay azlasufəl, lakəl aŋa azladza  
gudəŋ à vok.\*

<sup>11</sup> La lig la ahəŋ gənəŋà azlamalika aŋuwaw,  
uwana dza aslala vok aŋa matugway aw.  
Tanudà kursi à abà la azlatatak ufaɸ uwaga,  
ŋgaha la azlamadzahaga uwaga gesina dikəts.  
Kiya uwaga gətsənà mahabay aŋatà. <sup>12</sup> Tahàb la  
kuda zləkkà à magadzaw uwana takəɸ kà aŋa  
matulay:

'Ndzər, masla azlayla kà mazəbay la slaka  
azladza maslay,

La gorobu, la matsihila, la ndzəɸa,

La mazləbay, la masləkəway, ŋgaha la kikay  
gesina la ahəl aŋha.

Kay nənàwwàŋ mənŋga aŋha tsi!'

tagòɸ. <sup>13</sup> La lig la ahəŋ aya gotənaŋ dèwdèw  
tatak uwana Zəzagəla adfaŋ kà, tahàb ma-  
habay azlauwana la zagəla, azlauwana la gudəŋ  
la vok, azlauwana la tsəh iyaw, ŋgaha la  
azlauwana la iyaw la abà, gesina aŋatà tahàb  
mahabay tekula:

'Məzləɸa dza uwana la kursi la afik, ŋgaha  
la uwana maftsa à vok aŋa magadzaw  
uwana tadàhla matulay məsləkaw atà.

\* **5:10** 5.10 2Musa 19.6; Mahabay 33.3; 98.1; Yesayya 42.10

Maslay gesina atsa à waŋ kà la atà la ahàl. Məta-  
tasl atà à ahàl aŋa koksikoksi.'

<sup>14</sup> Mok uwana tahabay kiya uwanay azlatatak ufaɗ uwaga tagòɗ: “Amen”, ŋgaha azlamadza-haga uwaga takədèɗ à azlauwana à ahəŋ la kursi la afik, ŋgaha taslèkàw atà aya.

## 6

### *Magadzaw ahəl wakità aŋa mapəzlay*

<sup>1</sup> Mok uwana magadzaw azəb wakità masəlay məɗəf uwaga à ahàl, kiya uwaga gənəŋà adzəkà mapəzl masəlay matera. Mok uwana adafətalla à ama ala, matera aŋa azlatatak ufaɗ uwaga la sifa agòɗ: “Sà à waŋ”, matsənay aŋa kuda aŋha bokuba habaga. <sup>2</sup> Kiya uwaga gənəŋà pəlis medekuga asà à uda. La pəlis uwatà la afik kà, dza la afik alàk la ahàl, tavəl garamusa. Ahàd la makəɗaslay kà mats à atà à ahəŋ.✧

<sup>3</sup> Magadzaw afətà à masəlay masəla la ama ala. Gətsənà masəla aŋa azlatatak ufaɗ uwaga la sifa agòɗ aya: “Sà à waŋ.” <sup>4</sup> Ŋgaha pəlis anik asà à uda aya mativga vikuza. Dza uwana la afik aya kà, masla masəlla guvəl à gudəŋ à vok, kà azladza aŋa makaɗ vok kà à atà kà atà. Tavəl magol katsakar à ahàl.

<sup>5</sup> Ŋgaha aya magadzaw afətà masəlay mamakər la ama ala, ŋgaha gətsənà mamakər aŋa azlatatak ufaɗ uwaga la sifa agòɗ: “Sà à waŋ.” Gənərèz, ŋgaha gənəŋà pəlis marsiga, dza uwana la afik kà daram la ahàl. <sup>6</sup> Gətsənəŋ tatak anik atsən la tataka azlatatak ufaɗ uwaga

✧ 6:2 6.2 Zakari 1.8; 6.3,6

la abà la sifa, bokuba kuda aña dza. Masla agòd: “Sili aña sləray mavakay tekula aña dza kà asukway pəra kà hi tsergi nagoda tekula pəra, ama mərakala kà, nagoda makər.” Agòd à dza aña pəlis aya: “Kà aña amàl la iyaw aña matavərük maməsliga kà, tadza à ahəŋ kiya uwanay”, agòdal.

<sup>7</sup> Nğaha magadzaw afətà masəlay maufad la ama ala, nğaha gətsənəŋ maufad aña azlatatak uwaga la abà la sifa, agòd: “Sà à waŋ.” <sup>8</sup> Gənərèz à awtəy, nğaha gənəŋə pəlis uwana kuforuh ruhga. Dza uwana la afik kà, sləm aŋha kà: Mamətsay, nğaha mezewi anəfay la tsəh. Tavà à atà ndzəda kà aña makad à gay tekula aña maufad, aña gudəŋ à vok à gay. Tadàkadah atà la katsakar, la may, azladza anik tadàmatsah à dɸuvats à abà nğaha azlatatak fəta tadàkadah azladza anik aya.

<sup>9</sup> Kiya uwaga magadzaw afətà à masəlay mazlo la ama ala. Nğaha gənəŋə azlamasasədok aña azlamamatsay la slaka uwana takadah tatak à Zəzagəla. Takad azladza uwaga, kà uwana tazà gay Zəzagəla, nğaha kà uwana tagəd à gay aña Yesu à afik. <sup>10</sup> Mok uwana gənəŋə atà tawiyà la kuda zləkkà, tagəd: “Sufəl, kak tsikasla, kak dziriga. Azladza uwaga la vədah, la gudəŋ la vok takad anu, ma mana kadehəŋ aña madàh à atà seriya à gəl ma, nğaha kà seriya aña matəd atà à gel suwaŋ ma?” <sup>11</sup> Nğaha tatsòkwàh atà à lukut medekuga à abà, tagəd à atà: “Basàwwəŋ nɸuv aya, say takad azladedə aŋkul, uwana tanəfa Zəzagəla, bokuba uwana takad akul dadəŋ.

Baŋa takàd atà bokuba uwana Zəzagəla agòd kà pəra, seriya adàgay la ahəŋ.”

<sup>12</sup> Nŋaha aya magadzaw afətà masəlay maməkwa uwatà la ama ala. Gənəŋà kutso abəlakà à vok, afats apakà marsiga. Ama təla kà apakà mativga vikuza bokuba aŋiz. <sup>13</sup> Azlatsetsiliŋ tasòkw à ahəŋ la zagəla bokuba mayyay ahəf ŋuwazlaga, uwana magol kular asakwəŋ à ahəŋ. <sup>14</sup> Zagəla azalà tuwiz, bokuba uwana takəl tatak à abà. Azlagudəŋ uwana iyaw akàs atà à gay à adi tazàhla. Azlagudəŋ gesina tabàdàhà vok la slaka aŋatà la abà. <sup>15</sup> Kiya uwaga azladza gudəŋ à vok gesina tahàdàhà vok à gudəŋ à afik, ŋgaha tahàdàhà vok à azlatsakur uwana à agu la tataka azladzəgəla la abà. Azlamayà la azlauwana azlamayà aw gesina tahòy kà mahadàh vok à ahəŋ. Amiyaka azlasufəl, la azlamadzahaga, la azlaməŋga aŋa azlaslodzi, la azlagorobu, la azlauwana sləm aŋatà atsən ala, gesina aŋatà tahàd kà mahad vok à ahəŋ. <sup>16</sup> Atà tadàvə kuɖa à azlagudəŋ la azladzəgəla: “Fətəkàw anu à gəl, kamkam, tsakàw anu à ama, kà dza uwana la kursi la afik aŋa manəŋ anu aw, ŋgaha kà magadzaw aŋa madukw à anu seriya à gəl aw! <sup>17</sup> Iyay, mavakay aŋa məŋ mapak ləv aŋha kà adaslay. Uwa à uwana aslay aŋa matəfal à gay ala uwa? Dza la ahəŋ aslay aw”, tagòd.

## 7

*Malika adàh masəlay à azladza aŋa Zəzagəla à vok*

<sup>1</sup> Kiya uwaga la lig aña uwaga la ahəŋ aya, gənəŋà azlamalika ufaď tatsizlla ala la gay tər gudəŋ ufaď kà makəs azlakular ufaď aŋatà à ahəŋ, uwana taďəďay, kà atà aña maďəďay à gudəŋ à abà aw kà mawis kutso amiyaka iyaw ŋgaha la azlaahàf ala aw. <sup>2</sup> Gənəŋà malika anik uwana asà à waŋ la mas à afik afats, tatak maďàh masəlay à azladza à maďəgay aña Zəzagəla, uwana la sifa, la ahəl. Azalà azlamalika ufaď uwaga à tsəh azlauwana Zəzagəla, avà à atà ndzəďa kà mawis gudəŋ à vok ala, ŋgaha la iyaw ala. <sup>3</sup> Agòď à atà: “Kawisaw kutso, iyaw, ŋgaha la azlaahàf ala dadàŋ aw. Kùdàw tsəràh à uwana anu mənàh masəlay aña Zəzagəla à maďəgay aña azladza aŋha dadàŋ.”<sup>☆</sup> <sup>4</sup> Kiya uwaga la lig la ahəŋ atà tapəh à gi matugway aña azladza uwana tanahà à atà masəlay uwaga à maďəgay. Tagà dəbow dzim bəzi aŋha dzik ufaď, gəl aŋha ufaď. Azladza uwanay kà mayyi à tsəh ala aña azlatsəhay Isərayel gesina. <sup>5</sup> Aga la ahəŋ dəbow kulo gəl aŋha səla mayyi à tsəh ala aña Yahuda, dəbow kulo gəl aŋha səla la mayyi à tsəh ala aña Ruben, dəbow kulo gəl aŋha səla la mayyi à tsəh ala aña Gad. <sup>6</sup> Dəbow kulo gəl aŋha səla la mayyi à tsəh ala aña Asər, dəbow kulo gel aŋha səla la mayyi à tsəh ala aña Neftali, dəbow kulo gəl aŋha səla la mayyi à tsəh ala aña Manase. <sup>7</sup> Dəbow kulo gəl aŋha səla la mayyi à tsəh ala aña Səmeyyon, dəbow kulo gəl aŋha səla la mayyi à tsəh ala aña Levi, dəbow kulo gəl aŋha səla la mayyi à tsəh ala aña Isakar. <sup>8</sup> Dəbow kulo

---

☆ **7:3** 7.3 Hezəkiyel 9.4,6

gəl anha sèla la mayyi à tsəh ala anja Zabulon, dəbow kulo gəl anha sèla la mayyi à tsəh ala anja Yusufu, ngaha dəbow kulo gəl anha sèla la mayyi à tsəh ala anja Benyamin bay. Azladza uwaga gesina taga la masəlay anja Zəzagəla la vok anjatà.

*Maham à ahəŋ dza dagay gudəŋ à vok gesina*

<sup>9</sup> La lig anja uwaga la ahəŋ, gənəŋà maham à ahəŋ dza anjuvaw, dza aslala vok anja matugway aw. Azladza uwaga tasà à uda la azlatsəhay, la azlagay, ngaha tasà à waŋ la makad gəl à ahəŋ gudəŋ à vok gesina. Tatsizilla à ahəŋ la huma kursi, ngaha la huma anja magadzaw, tatsòkwàh lukut medfekuga à abà, ngaha la azlababasl la ahàl anjatà kà mazləbàla. <sup>10</sup> Tawiyà la kuda zlèkkà: “Zəzagəla uwanay la kursi la afik atà la magadzaw la uwana tatəfà anu”, tagòd. <sup>11</sup> Azlamalika gesina tatsàzl à makəla kursi, ngaha à makəla anja azlamadzahaga, ngaha à azlatatak ufad uwatà la sifa. Atà takədèdàh à huma kursi, la makas gəl à vədah, ngaha tasləkàw Zəzagəla, <sup>12</sup> la magodfay: “Hadfay gà, mazləbay, la matsihila, la kikay gami, la masləkaway, la ndzəda, la makoray gesina taga la ahàl anja. Azlauwaga kà Zəzagəla gami akoray anja tsərəh à awtày. Amen!” <sup>13</sup> Tekula anja azlamadzahaga dzik sèla gəl anha ufad uwaga agòd à gi: “Kasəl azladza uwaga tatsòkwàh lukut medfekuga à abà ay? Tasà à waŋ à ama la?” <sup>14</sup> Gəgòdal: “Kak, la uwana kasəl mənğa, gi kà, gəsəl aw.” Agòd à gi: “Azlauwanay kà, azlauwana tasà ngərpa mənğa, uwana aduwa ndzəda anjatà la makad

gəl à ahəŋ. Tadza à ahəŋ la dziriga la abà. Atà tapalàh lukut aŋatà kuzekaka la aŋiz aŋa magadzaw la abà. <sup>15</sup> Kà uwaga à uwana tatsizlla à huma kursi aŋa Zəzagəla, tazləb masla la mən gày aŋha la aku, mavakay la mahənay, dza uwaga la kursi la afik adàhuḅ atà à gəl. <sup>16</sup> Kà may aŋa maz atà à aya aw, nəlay aŋa makəs à atà babay aya aw. Marabak aŋa maslərnàhatàla aya aw, tatak anik la ahəŋ adàvəḏ à atà la maz à atà aya aw. Kà mana ma? <sup>17</sup> Kà uwana magadzaw, uwana la tataka aŋatà la kursi la afik adàgay masla manəŋla atà. Adàdahla atà à gay aŋa iyaw aŋa sifa uwana akəlay. La kità aya, Zəzagəla adàslasladàh atà iyaw tugwi la adi ala.”✧

## 8

### *Magadzaw afəta masəlay maməḏəf à wakità la yok ala*

<sup>1</sup> Bə gotənaŋ magadzaw afətà masəlay maməḏəf la ama ala, uwana agà makəḏ gəl à ahəŋ. Mək uwana adafətal la ama ala, tatak gesina la zagəla ‘Məslək’, tagoḏ aw, tadzà à ahəŋ titi tsərəh à tenma aŋa sa. <sup>2</sup> Nŋaha la lig aŋa madz à ahəŋ titi la ahəŋ, gənəŋà azlamalika məḏəf uwana tatsàzl à ahəŋ la huma Zəzagəla, tabəzàl mazlazliŋ məḏəf la slaka aŋha.

<sup>3</sup> La abatà aya, malika anik asà à waŋ la slaka makəḏ tatak la abà, la ahəl aŋha daram madəhəŋ gà la luwàluwà, tavəl kidzidzi aŋuvaw, kà masla aŋa maḅəkay, la slaka makəḏ tatak

✧ **7:17** 7.17 Mahabay 23.1; Yesayya 49.10; Hezəkiyel 34.23; Daniyel 12.1

luwàluwà gà uwatà la afik, la huma Zəzagəla, ɲgaha la mavà y la slaka gà azlamadəv kufa aɲa mənə maɲɲal gəl à vok. <sup>4</sup> Kəsək aɲa kidzidzi uwana aduwal à akàl à tsəh, asà à malika uwatà la ahàl ala dzedzika la huma Zəzagəla, ɲgaha la madəv kufa aɲa azladza aɲha, uwaga adàl à sləm à agu aya. <sup>5</sup> Mok uwana malika adadehəɲ kiya uwanay, azəb daram uwaga ahənən ala la slaslay akàl la slaka makad tatak la abà, ɲgaha adùw à vədah. Uwaga masləh mələ aɲa habaga atsən azlamawutsəday tawutsədàh, ɲgaha kiya uwaga kutso abəlakà vok.

*Azlamazlazliɲ mədəf*✧

<sup>6</sup> La lig la ahəɲ, azlamalika mədəf uwana mazlazliɲ agàhà à atà la ahàl tadəhà vok à ahəɲ kà aɲa matsay.

<sup>7</sup> Malika matera atsà mazlazliɲ aɲha, matsatsay iyaw, la akàl mahohodəfəla la aɲiz asùw à vədah. Kiya uwaga tekula aɲa mamakər aɲa gudəɲ à vok ababəh à gay, la azlaahàf la azlakəsaf aɲha gesina, dənna.

<sup>8</sup> Malika masəla atsa mazlazliɲ aɲha aya. Azəb mən tatak anik, bokuba mən gudəɲ dzəgərha, akàl ababəhay la afik. Atsàl gəl à magol dərəv à abà, ɲgaha tekula aɲa mamakər aɲa iyaw apakà aɲiz. <sup>9</sup> Azlatatak uwana la iyaw uwaga la abà gesina, taməts à gay hənats; azlakəslah iyaw tawis ala gesina babay.

<sup>10</sup> Kiya uwaga aya, malika mamakər atsà mazlazliɲ aɲha. Magol tsetsiliɲ mənɲa abəd à vok la zagəla, uwana ababəhay bokuba akàl atəd

✧ 8:5 8.5 2Musa 7.14-12.51



à azlamukwà à tsəh la azlazləlok. <sup>11</sup> Tsetsilin uwatà kà sləm aṅha kà vèzlmadiya. Tekula aṅa mamakər aṅa iyaw uwatà, apakà dəhakak, mok uwana azladza tas iyaw uwatà, aṅuvaw la tataka aṅatà la abà tamàts, kà iyaw uwatà.

<sup>12</sup> Bà gotənaṅ aya, malika maufad atsà mazlazlin aṅha. Mok uwana adatsay, tekula aṅa mamakər aṅa afats, ṅgaha la təla apakà marsiga tsiktsetsik. ṅgaha tekula aṅa mamakər aṅa azlatsetsilin apakà marsiga babay. Kiya uwaga taud aya aw. Tekula aṅa mamakər aṅa mavakay aṅa afats atəf à zagəla, ṅgaha tekula aṅa mamakər mahənaṅ vəd aṅa təla atəf à zagəla bay.

<sup>13</sup> La kità aya, gənəṅà zulo uwana ahoyay la ləv zagəla la abà la magodfay: “Kayyà, kayyà, ṅgərpa adəgay la azladza uwana la vədah. A baṅa mazlazlin aṅa azlamalika makər uwanay adətsənaṅ, ndzer”, agòd.

## 9

<sup>1</sup> Kiya uwaga aya gotənaṅ malika mazlo atsà mazlazlin aṅha aya, gənəṅà tsetsilin uwana atəd à ahəṅ la zagəla. Tavàl tsəkurəm kà mapəzlla afək zəṅzəṅga kà mələs tuwisl la abà. <sup>2</sup> Mok uwana tsetsilin uwaga apəzl afək uwaga, dəhut, kəsək asà à uda la abà bokuba kəsək aṅa matəl tatak. Kəsək uwatà atsək afats à ama taba-damma akəl mələs. <sup>3</sup> Dəmdadəm dawanagay asà à uda la kəsək uwaga la abà, taslèhà gəl à gudəṅ à vok. Tavà à atà ndzəda kalkal la aṅa aliz. <sup>4</sup> ṅgaha tagòd à atà kà: “Pədfəw azlakəsaf, la azlaahəf uwana atsà à uda la kutso la abà aw, ama dəw kà mawisəṅla kà azladza gudəṅ

à vok ala pəra, azlauwana kokudə masəlay aŋa Zəzagəla la madəgay aŋatà”, tagòd à atà. <sup>5</sup> Tavà à atà tetəvi kà aŋa makəf azladza aw, ama pəra kà: “Katəreḃaw atà”, tagòd atà, tatəreḃ atà kà aŋa təla zlo, azlamazay uwaga kalkal la mazay aŋa aliz. <sup>6</sup> La təla zlo uwatà, azladza tayàh mamətsay ama tabəzəl aw. “Sà à waŋ, sà à waŋ”, tagòd à mamətsay, ama mamətsay ahòy atà à ahəl.

<sup>7</sup> Nəŋəw azladawnagay gə uwana tadəbàni à vok la azlapəlis aŋa guvəl, tapakà tatagà à gəl, bokuba garamusa aŋa luwəluwə. Hudf adi aŋatà kà kalkal la hudf adi aŋa azladza. <sup>8</sup> Nŋaha aŋidz aŋatà kà bokuba aŋidz aŋa azlamis, slidf aŋatà kà kiya aŋa sikalaveri. <sup>9</sup> Tawəfəh slarapay aŋa ada à makəla aŋatà, ŋaha mahohumay aŋa azlagogozlāh aŋatà kà, kalkal la mahohumay aŋa azladərkwa uwana azlapəlis tabiyəŋ, kà mad à guvəl aya. <sup>10</sup> Gudaz aŋatà godam la gay, bokuba aŋa azlaaliz, gudaz aŋatà uwaga la uwana avà à atà ndzəfə kà mamalla azladza tsərah à təla zlo. <sup>11</sup> Məŋga aŋatà kà masla la uwana akoray lakəl aŋa afək zəŋzəŋga uwaga, sləm aŋha la gay ibəranəŋkowen kà *Abaddon*, ŋaha la gay gərək kà *Apollyon* (Uwana asal magodəy: masla makalāh tatak à ahəŋ)

<sup>12</sup> Kiya uwanay à uwana, ŋərpa matera adà à lig. Aganay azlanŋərpa səla tazlanjalay aya zlà.

<sup>13</sup> Kiya uwaga malika maməkwa atsà mazlazliŋ aŋha, gətsənəŋ kuda, atsən la gay ndzika ufad aŋa slaka makəf tatak, uwana madəhəŋ gə la luwəluwə la huma Zəzagəla. <sup>14</sup> Kuda uwaga agòd à masla mats mazlazliŋ uwaga la ahəl à

ahàl: “Pàlla azlamalika ufad uwaga ala, uwana tawàdàh atà à ahəŋ la gay məŋ mukwà uwana tazalalla Efərat.” <sup>15</sup> La abatà kà, tapèlla atà ala. Zəzagəla adahà atà à ahəŋ la mavay uwanay la abà, la təla uwanay la tsəh, la mavakay uwanay, ŋgaha la sa uwanay, kà takad tekula aŋa mamakər aŋa azladza gesina. Kà aŋa uwaga à uwana: “Pàlla atà ala”, kuda agòd à malika uwaga. <sup>16</sup> La abatà aya tapəhgəla maham à ahəŋ aŋa azladza uwana tahàd à pəlis guvəl à afik, “Million dadərmokw səla”, tagòd à gi. <sup>17</sup> Kiya uwaga à uwana gənəŋà la mafətal la ama ala uwaga la abà. Gənəŋà azlapəlis uwaga, ŋgaha azlaməna madàh à afik. Tawàdàh vok ala la azlaslarapay aŋa guvəl mativga bokuba akàl, azlaanik makur zagəla kurzagəla, azlaanik mazaybəzi zaybəzi. Akàl kəsək ŋgaha huleli tasà à afik la maŋula aŋatà dzedzika. Gəl aŋa azlapəlis aŋatà kà, bokuba gəl aŋa azlasikalaveri. <sup>18</sup> Akàl, kəsək ŋgaha huleli la uwana tagà azlaŋərpa makər uwana tasà à uda la maŋula aŋa azlatatak mapəlis pəlis gə uwaga, takad tekula aŋa mamakər aŋa azladza à gay. <sup>19</sup> Kiya uwaga la maŋula kuda aŋatà la ahəŋ, la uwana ndzəda atsà à afik, ŋgaha aya gudaz aŋatà kà bokuba gəl bebi, kà matsàhla azladza.

<sup>20</sup> Ama kà matəm à ahəŋ aŋa azladza uwana tamatsàh à ŋərpa uwaga ahàl aw, tasakà à madehəŋ aŋatà la tsəh ala aw, tadà à huma à gay la makədédəhay à azlamasasəfok à ahəŋ, ŋgaha la masləkawàh à azlafəla, uwana tādàhàhəŋ la luwàluwà, la gursu, la ada vərzega-

niga, la azlaakur, ngaha la azlaahàf. Tekedika azlafəla uwaga kà, tatak la ahəŋ tafehəŋ aw, taslala vok kà aŋa manəŋla aw, tatsən sləm aw, ngaha today bay aw. <sup>21</sup> Azladza uwaga tadà à huma à gay la makad dza babay, tasakàl à tsəh ala aw. Tayàhàh azlaahàf anik anik, ngaha tafahàhà mabila la mad à gəl gesina. Tetuw, tetuw ləv avàl à atà à gay kà mawul à lig aw.

## 10

### *Malika uwana la bəzi wakità la ahəl*

<sup>1</sup> Kiya uwaga la lig la ahəŋ, gənəŋəŋ magol malika anik, atsà à ahəŋ la zagəla, lukut aŋha uwana la vok kà habaga, mafafad gəl à uda gə la gəla makoz akoz, hud adi aŋha kà awutsəday bokuba afats. Asik aŋha kà bokuba alàh aŋa akàl. <sup>2</sup> La ahəl aŋa malika uwaga, bəzi wakità mapəzlay gə la ahəl. Adùw asik ahəl kaf aŋha à dərəv à gəl, asik ahəl gudzay kà afa à kutso à abà. <sup>3</sup> Abadmà la kuda zləkkà, bokuba mawiyay aŋa sikalaveri uwana atawahay. Mok uwana abadmà, gətsənà masləh mələ mədəf aŋa habaga awulàlla. <sup>4</sup> Ama mok uwana habaga aslèh mələ mədəf, gəwoyà matsetser uwana tapèh, ama gətsənà kuda anik asà à ahəŋ la zagəla agòd à gi: “Kəsàŋ kà aŋak pəra, à uwana habaga apèh, awkà katsetser aw”, agòd à gi.

<sup>5</sup> Kiya uwaga malika uwana afà asik anik à dərəv à gəl, ngaha anik à kutso à abà, adzilà ahəl kaf aŋha à zagəla. <sup>6</sup> Masla azùw mawaday la sləm aŋa Zəzagəla uwana adəv à gay aw, à masla uwana adfahà zagəla, ngaha la azlatatak

uwana la afik gesina, adahà kutso la azlatatak uwana la abà gesina, ngaha adahà iyaw aya la azlatatak uwana la iyaw la abà gesina aya gotənaŋ. <sup>7</sup> Agòd̄ aya: “Baŋa mazlazliŋ aŋa malika maməðəf adàtsənay, Zəzagəla adàhənəŋ ala madzugway aŋa nasiri aŋha, say tatak uwaga gesina kà apakà vok la katskats, bokuba uwaga Zəzagəla apəh à azlaməna mapəh à atà gay à ahàl kà mapàh à azladza.”

<sup>8</sup> Ngaha kuda uwana gətsənàŋ dagay la zagəla, agòd̄ à gi aya: “Hàd, zəb̄ wakità mapəzlay gà uwaga la ahàl aŋa malika, uwaga asik tekula la dərəv lakəl, ngaha asik anik la kutso la abà”, agòd̄ à gi. <sup>9</sup> Kiya uwaga, gəhàd̄ à slaka malika, gəgòd̄al: “Và à gi bəzi wakità uwanay.” Masla agòd̄ à gi: “Pàd̄, adàgay namnam la gay aŋak, bokuba zuway mazuway, ama baŋa kadàdugw à gay ala kà, adàgay dəhakak la huđ aŋak”, agòd̄ à gi. <sup>10</sup> Ngaha gəzəb̄ wakità uwaga la ahàl aŋha, gəpàd̄. Ndzer, agà namnam la gay gulo bokuba zuway mazuway hađay. Ama mok uwana gədadugw à gay ala kà, dəhakak, hađay.

<sup>11</sup> Tagòd̄ à gi aya kà: “Say kaz paŋaw aŋa Zəzagəla uwana apəh lakəl aŋa azladza uwana tasà à uda la azlatsəhay la azlagay anik anik gesina, uwana tasà à waŋ la makəđ gəl à ahəŋ gudəŋ à vok gesina, ngaha la azlasufəl aŋatà”, tagòd̄ à gi.

## 11

*Azlaməna sayda səla*

<sup>1</sup> Kiya uwaga aya, tavà à gi golakay, bokuba azəva magurla tatak, tagòd à gi: “Hàd, gùr gày Zəzagəla, ɲgaha slaka makad tatak aya. Tùgw azladza uwana tadəv kudà à Zəzagəla la aku babay aya”, agòd à gi.✧ <sup>2</sup> “Ama kagur lig gà aw, sàkal kità”, agòd à gi. “Kà uwana masla kà gəvə à azladza uwana azla Yahudiya aw. Atà tadàhaba à ahəɲ ala gudəɲ aɲa Zəzagəla tsikaslaga, tsərəh à təla dzik ufad gəl aɲha səla. <sup>3</sup> La lig la ahəɲ gədàsləl azlaməna sayda gulo səla à awtày”, agòd. “Uwana tadətsokwah à lukut kudà à abà, ɲgaha atà tadàza gay gulo à azladza la kaslè uwatà tsərəh à mavakay dəbow la dadərmokw səla bəzi aɲha dzik mukwà”, kiya uwaga agòd à gi.

<sup>4</sup> Azlaməna sayda səla uwaga kà atà səla nna, tatsizlla à ahəɲ la huma Sufəl Zəzagəla uwana akor gudəɲ à vok. Atà azlaahəf səla uwana tazala atà ala kuvu. Gotənaɲ azlafənəs səla aya babay. <sup>5</sup> Baɲa dza asal madàh à atà mawisiga à vok kà, akəl atsa à waɲ la gay aɲatà la awtày, ɲgaha ababəh atà à gay. Kiya uwaga tadàkad atà azlauwana tayàh madàh à atà mawisiga à vok. <sup>6</sup> La kità, la mok uwana tadəzah sayda kà, atà la maslay kà matsakay à zagəla à ama, kà iyaw aɲa manəf à ahəɲ aw. Gotənaɲ, atà la maslay aɲa mapak iyaw ala kà aɲiz, ɲgaha atà la maslay kà aɲa mav azlaɲgərpa anik anik à azladza gudəɲ à vok, bokuba uwana asa atà bay.

<sup>7</sup> ɲgaha mok uwana tadədəv maz gay aɲatà à gay, tatak fəta asa à uda la afək zəɲzəɲga la abà,

---

✧ **11:1** 11.1 Hezəkiyel 40.3; Zakari 2.1-2

akəs atà la guvəl, aduwa atà, ɲgaha akad atà.  
<sup>8</sup> Kiya uwaga azlavok aɲatà kà, tadàdza à ahəɲ la tetəvi aɲa məɲ huf gudəɲ la slaka uwana tatàsl Sufəl aɲatà à ahàf à adi uwarà. Gudəɲ uwatà tazalalla la gay zil kà Sodom baɲaw Misəra, kà uwana azlagudəɲ uwaga tafahàhà mabila, takəs gay aɲa Zəzagəla aw. <sup>9</sup> Haday, azladza uwaga tasà à uda la azlatsəhay aɲa azlagay, ɲgaha tasà à waɲ la makad gəl à ahəɲ gudəɲ à vok gesina. Atà tadənərəz mazimnekid, mavakay makər la tenma, tadàvə tetəvi kà mal atà aw. Kà uwana tagod kà: “Atà səla nna, tawisà gudəɲ à vok ala”, tagod. <sup>10</sup> Kiya uwaga azladza gudəɲ à vok tadàbak agər à abà, kà uwana takad azladza səla uwaga. Atà tadàhabahah azlamadevaday la mavəhay azlatatak deyday babay. Kà uwana azladza səla uwaga tasàh zladà à azladza gudəɲ. (La maz gay Zəzagəla uwana tazàhàɲ) <sup>11</sup> Iyay, mok uwana mavakay makər uwaga la tenma adada à lig, Zəzagəla afəta atà afad à gəl kà mawulla atà ala sifa, ɲgaha hahadzək, tatsazlla ala. Azladza uwaga la abatà gesina guba akəs à atà. <sup>12</sup> Mok uwana tatsizlla, tatsəna kuda atsəna à ahəɲ la zagəla, agod à atà: “Sàw à afik à abanay!” Kiya uwaga tada à afik la habaga la abà, la yewdi aɲa azlaməna məzam aɲatà. <sup>13</sup> La mok uwatà kutso abəlaka vok məɲga, tsərəh à uwana tenma aɲa makulo aɲa gudəɲ uwatà azala tetuwa. Mabəlaka vok aɲa kutso uwaga kà, azaɲ ala dza dəbow mədəf, matəm à ahəɲ aɲa azladza uwaga kà, guba akəs atà məɲga. La vud uwaga tanəɲa məɲga aɲa Zəzagəla, tasləkaw.

<sup>14</sup> Kiya uwanay à uwana ɲgərpa masəla

uwanay ada à lig. Ama han̄kəli, aganay ma-  
makər uwana azlaṅalay aya gotənaṅ zlà.

*Mazlazliṅ makəfal gəl aṅa malika*

<sup>15</sup> Kiya uwaga malika maməðəf atsà mazla-  
zliṅ, azlakuda tatsənà à ahəṅ la zagəla, ṅgaha  
tagòd: “Sufəl Zəzagəla gami la masla uwana  
mafal dzakwa à gəl gà kà: Gudəṅ à vok adagay  
la ahəl aṅatà kà makoray. Makoray aṅatà  
adànats à gay ala aw.” <sup>16</sup> Mok uwana takəð  
gəl à uwaga, azlamadzahaga dzik səla gəl aṅha  
ufad uwana tadzàhà madzay la kursi la afik, la  
huma Zəzagəla takàsà gəl à ahəṅ la huma aṅha,  
tazləbà, <sup>17</sup> tagòd:

“Hadfay, Sufəl, kak uwana kaga la ahəṅ la sifa  
dagay uwarà. ṅgaha kak la ahəṅ la sifa  
lakana aya. Kikay məgod à ka, kà uwana  
tatak gesina adada à ka à ahəl, kagay la  
kəl gà gesina.

<sup>18</sup> Kiya uwaga azladza uwana tasəl kak aw, atà  
tapakà ləv lakəl aṅak. Ama la uwaga  
kà, sà aṅak adaslay kà kak aṅa mapak  
ləv lakəl aṅatà suwaṅ. Kaslà adaslay à  
uwana kadàh seriya à azlamamatsay à gəl.  
ṅgaha aya kaslà adaslay à uwana kavà  
masik à azlamayà aṅak, uwana kapəh à  
atà gay à ahəl aṅa mapàh à azladza. Kak  
kadàvə masik à azlatsəhay aṅak gesina,  
azlaməṅga, bə amiyaka bə la azlabəza gà  
bay. Azlauwana takès gay aṅak gesina, ka-  
davà à atà masik. Ama kà aṅa azlauwana



tawìs gudəŋ ala kà, kaslà adaslay à uwana kak aŋa madàzahatàla suwaŋ!”,<sup>☆</sup> tagòd.

<sup>19</sup> Mòk uwana tadəv uwaga à gay gesina, gày aŋa Zəzagəla apəzlla vok la zagəla, tsəràh à uwana azladza tanəŋà sahar makəs vok slawda apokwà vok la paraka. Azlamawutsəfay tawutsə̀fàh bəzlbabəzl, habaga aslèh məlo, kutso abəlakà vok, ŋgaha matsatsay iyaw anis à ahəŋ aŋuvaw.

## 12

### *Slagəla la zagəla*

<sup>1</sup> Kiya uwaga məŋ nadzipo apəhla vok ala la zagəla. Aganay nadzipo uwaga: Mis tekula uwana adatsokw afats à abà bokuba lukut, abək asik aŋha kà à təla à afik, nalbət aŋha babay kà, taga kà azlatsetsilin kulo gəl aŋha səla, bokuba garamusa aŋa sufəl. <sup>2</sup> Mis uwaga aga la bəzi la huɸ, azlāsokw à ahəŋ, ŋgaha aga la mabas vok la abà, awiyay kà mazəŋ aŋha.

<sup>3</sup> Ama nadzipo anik apəhla vok ala la zagəla aya. Tatagà məŋga gə bokuba kudu, ŋgaha mativga, uwana akor gəl məɸəf, ŋgaha dərew kulo kulo la kəla gəl gesina la garamusa. <sup>4</sup> Tatagà uwaga kà la gudaz. Gudaz aŋha kà abəɸ tsetsilin tenma aŋa mamakər aŋa zagəla à ahəŋ, ŋgaha awits atà à vəɸah. Tatagà uwatà atsizlla à ahəŋ la huma aŋa mis uwaga, asəl masokw à ahəŋ, kà masla aŋa mapila à gay, à baŋa adasokw à ahəŋ. <sup>5</sup> Mis ayyà bəzi zilga, uwana adànəŋla tsəhay

<sup>☆</sup> **11:18** 11.18 Mahabay 2.5; 110.5; 115.13

gesina la agəla ada. Mok uwana adayyay, tazəb bəzi uwaga katskats, tadàlla à slaka Zəzagəla uwana la kursi la afik. <sup>6</sup> Ama mis kà ahòy à kəsaf à abà, la slaka uwana Zəzagəla adfahàllàn à ahəŋ. Masla adzadzaray la abatà tsərəh à mavakay dəbow la dadərmokw səla bəzi aŋha dzik mukwa.

<sup>7</sup> La lig la ahəŋ gənəŋà à zagəla kà guvəl adadzəka à vok. Misel ŋgaha la azlaməna aŋha tapa guvəl la tatagà uwaga la azlamalika aŋha.✧

<sup>8</sup> La abatà Misel la azlamalika aŋha taduwà atà, kiya uwaga slaka abəzà à vok kà tatagà la azlaaŋha aŋa madz à ahəŋ la zagəla aya aw, <sup>9</sup> aga maduw à vədah gā. Tatagà mənğa uwaga, la uwana maviya bebi, masla uwana azahà azladza gudəŋ à vok gesina ala, sləm aŋha kà, baba aŋa mawisiga, sləm aŋha anik aya kà seteni. Tadùw à vədah, masla la azlamalika aŋha gesina.

<sup>10</sup> Ŋgaha la lig la ahəŋ, gətsənà kuda atsən à ahəŋ la zagəla agòd: “Lagonay kà mazləbay aŋa Zəzagəla kà, adapaka vok, lagonay kà, Zəzagəla adapəhla makoray aŋha ala. Lagwa Kristu adapəhla maslay aŋa ndzəda aŋha ala, kà uwana masla məzam gami, uwana atsàzlàh à huma Zəzagəla, uwana apapàtəh azladedə gami, kà matəh à atà kaf à gəl mavakay la mahənay gesina kà, taməl à uda la zagəla. <sup>11</sup> Azladedə gami tatsà à ahəŋ. Kikay kà aŋiz aŋa magadzaw, ŋgaha kikay kà gay dziriga uwana tazətəŋ, atà takəs mav sifa aŋatà. <sup>12</sup> Kà uwaga à uwana,

✧ 12:7 12.7 Daniyel 10.13,21; 12.1; Yahuda 9

takudèk seteni à ahəŋ la zagəla. Ngaha akul, azladza uwana la afik, rabàw! Ama kà aŋkul gudəŋ à vok la azladərəv aya, ɲgərpa la akul, kà uwana seteni kà tadaməl à slaka aŋkul la vədah. Apakà ləv, kà uwana asəl kà kaslà aŋha kà atəm à ahəŋ kà ɲuv pəra.”

<sup>13</sup> Mok uwana tatagà uwaga asəl kà taməl à vədah kà, adzəkà manəf mis uwaga la tsəh, ayyà bəzi zilga. <sup>14</sup> Atà tavà gogozläh à mis, kalkal la aŋa zulo məŋga gə, kà aŋa mahoyay à humala katskats la uwaga, à slaka aŋha uwana à abà Zəzagəla adàdzadzarayla à abatà. Mavay makər la tenma adàdza à ahəŋ la abatà, kà bebi uwaga aŋa makəsay aw. <sup>15</sup> La kiya uwaga, bebi adahəŋ dabaray la mavəläh iyaw à vədah kà iyaw aŋa manəf mis la tsəh aŋa mazəb mis. <sup>16</sup> Ama kutso azlāk mis, apəslāk ala, asà iyaw uwana à gay, asà à uda la hud aŋa tatagà uwaga. <sup>17</sup> Kiya uwaga tatagà uwaga abəzà à mis à tsəh aw, vədzəgəläh agolà vok aŋa maday aŋa map guvəl la azlamayyi à tsəh ala aŋa mis uwaga. Azlamayyi à tsəh ala aŋha uwaga kà, azlauwana takəs gay Zəzagəla, ɲgaha atà uwana tanəfà dziriga aŋa Yesu, uwana apəhatàla. <sup>18</sup> Kiya uwaga tatagà uwaga ahəd, atsizl à gay dərəv.

## 13

### *Tatagà uwana azal azlatatagà anik səla*

<sup>1</sup> Kiya uwaga gənəŋà tatagà anik asà à uda la dərəv la abà, uwana agà la azlagəl dzadzukwa mədəf, ɲgaha la kəla gəl aŋha kà, dərəw kulo kulo la kəl. Kəla dərəw aŋha kà garamusa aŋa

sufəl la tsəh. La kəla gəl aᅇha la vok babay kà, sləm mawisiga aᅇa magodəhay à Zəzagəla la vok. <sup>2</sup> Tatagà uwatà kà, gənerəz kà, maftsa vok aᅇha kà bokuba zimməli, azlaasik aᅇha kà bokuba azlaasik aᅇa balagoday. Nᅇgaha gay aᅇha kà bokuba gay aᅇa sikalaveri. Abədfla tatagà uwaga à slaka aᅇha à abà. Tatagà uwana adzà madzay la kursi aᅇa kudu la afik, abəzà ndzəda aᅇha babay. <sup>3</sup> Ama gənəᅇəᅇ kà tekula la tataka azlagəl aᅇha la abà kà, bokuba makəday gə uwarà, ᅇgaha amik aᅇha awür ala, akəs nadzipo à azladza gudəᅇ à vok gesina, ᅇgaha abiyà atà la uwaga, tanəfà masla. <sup>4</sup> Kiya uwaga, azladza gesina tasləkàw tatagà uwana avà ndzəda aᅇha à tatagà uwaga. Tasləkàw tatagà uwaga babay, la magoday: “Uwa à uwana məᅇᅇga bokuba tatagà uwanay uwa?”, tagòd.

<sup>5</sup> Kiya uwaga tatagà uwaga abəzà à tetəvi aᅇa mapəh mawisiga à Zəzagəla à vok, abəzà maslay aᅇa madəhəᅇ kiya uwanay kà, kà aᅇa təla dzik ufađ gəl aᅇha səla pəra. <sup>6</sup> Tatagà uwaga adzəkà mapəsew slaka aᅇha la zagəla, la azlauwana tadzà à ahəᅇ la afik, la sləm aᅇha, ᅇgaha bamərika Zəzagəla la gəl aᅇha, apəsəw masla babay. <sup>7</sup> Masla abəzàl tetəvi aya aᅇa map guvəl la azladza aᅇa Zəzagəla, ᅇgaha la makədasl atà la gudəᅇ la vok. Avàl ndzəda aya lakəl aᅇa azladza uwana tasà à uda la azlatsəhay la azlagay la abà, ᅇgaha tasà à waᅇ la makəđ gəl à ahəᅇ gudəᅇ à vok gesina la ahàl aᅇha aya. <sup>8</sup> Azladza gudəᅇ à vok gesina tasləkàw tatagà uwaga, bokuba magoday, azladza uwana sləm

aṇatà la ahəŋ la wakità aṇa sifa la abà dagay madzəka aw. Say magadzaw uwana takəɗla, la uwana akor wakità uwaga pəra.

<sup>9</sup> Agòɗ: “Kanekaw à sləm à ama aw, tsənàw gay uwanay gəpəhay!” <sup>10</sup> Kiya uwaga agòɗ: “Dza uwana mokfak aṇa makəs à daṇay la vok, ndzer kà tadəkəs à daṇay, tadəkəɗay la katsakar aya dza uwana la mokfak aṇa katsakar la vok. Kay, tsa baṇa kiya uwanay kà, ḡləm azladza aṇa Zəzagəla tabasəŋ la maday à huma à gay la madinḡ gəl à Zəzagəla à vok, kà atà aṇa madz à ahəŋ la adi.”

<sup>11</sup> Kiya uwaga gənəŋà tatagà anik asà à lag la kutso la aku. Masla la dərəw səla lakəl, bokuba magadzaw, apəhay kà la kuda uwana agagazläh azladza ala. <sup>12</sup> Masla adähla sləray la ndzəɗa aṇa matera, ḡgaha la masəlay aṇa matera bay. Tatagà masəla uwaga afà leri à azladza gudəŋ à vok à gəl, kà atà aṇa masləkaw matera gə uwaga, à masla uwana la amik mamətsay la vok, awür ala. <sup>13</sup> Masəla gə uwaga adfahàhà azlatatak nadzipo mənḡa, azalà akəl à ahəŋ la zagəla la yewdi aṇa azladza gesina. <sup>14</sup> Masla abəzəl tetəvi kà madàh azlanadzipo la huma aṇa tatagà matera gə uwatà, avavàràhà azladza gudəŋ à vok à bada à abà la magoɗ à atà: “Nàlàw mazlazlay la maftsa vok aṇa tatagà uwaga awurà ala la amik aṇa katsakar la abà, aṇa masləkaw masla.” <sup>15</sup> Kiya uwaga tatagà uwanay apəh, kiya uwaga kà masla mabəzal ndzəɗa kà mafətay afad sifa à mazlazlay, atà aṇa madzəka mabafma, atà akad azladza gudəŋ à vok à gay gesina, azlauwana

takweska gay aṅha. <sup>16</sup> Tatagà uwaga afà leri à azladza à gəl gesina, azlabəzaga la azlaməṅga, azlagalepi la azlaməna kuɗa, azlamayàga ṅgaha la azlauwana takor gəl, kà atà mabəz masəlay la ahəl kaf, baṅaw la madəgay. <sup>17</sup> Uwaga aṅa mapəhla ala kà: Dza uwana la masəlay uwaga aw, tetəvi la ahəṅ kà aṅha aṅa masukw tatak, amiyaka bà maduw tatak ala aw. Masəlay uwaga kà sləm aṅa tatagà uwaga. Sləm aṅha bay kà kəzłakula.

<sup>18</sup> Lagonay la uwana anu mədàh matsihila, dza uwana la haṅkəli kà aslala vok aṅa masəl godega aṅa gay uwanay tapəh, la matugway aṅa tatagà uwanay la abà, kà uwana matugway uwaga kà, magazləla gə la sləm aṅa dza, matugway uwaga aga kà dadərmokw mukwa, la dzik mukwa gəl aṅha mukwa.

## 14

### *Azladza aṅa Zəzagəla tahab mahabay mawga la zagəla*

<sup>1</sup> Mok uwana uwaga adada à lig, gənəṅà tatak anik aya. Gənəṅà magadzaw uwana adatsizlla à ahəṅ la gudəṅ uwana la afik, tazalalla Siyon. Masla la azladza uwana masəlay aṅa sləm aṅa Zəzagəla Baba, la aṅa magadzaw aga la atà la madəgay aṅatà. Matugway aṅa azladza uwatà kà taga dəbow dzim bəzi aṅha dzik ufaɗ gəl aṅha ufaɗ.\* <sup>2</sup> Ṅgaha aya gətsənà mahohumay la zagəla, uwana adaḅani vok la mahohumay aṅa iyaw. Mahohumay aṅha babay kà bokuba

\* 14:1 14.1 Hezəkiyel 9.4

mahohumay anja habaga, ngaha bokuba mahohumay anja madəfəđ nizin. <sup>3</sup> Kiya uwaga azladza dən uwaga tatsəzl à huma kursi anja Zəzagəla la huma anja azlatatak ufađ uwana la sifa, ngaha la huma azlamadzahaga uwatà. Tahàb mahabay mawga. Tetuwa masla masəl mahab mahabay uwatà la ahən aw. Say atà uwatà Zəzagəla abəl atà pəra. <sup>4</sup> Azladza uwaga tanənla gəl anjatà la tsikasla la abà, kà uwana tagagamàh la azlamis aw. Atà tanəfà magadzaw la tsəh à kəla slaka uwana adà à abà gesina. Atà uwana mabək atà gà à fəta à awtày la tataka azladza anik la abà kà anja Zəzagəla la magadzaw. <sup>5</sup> Fida asà à wan la gay anjatà aw, atà sətaka.\*

*Aganay gay lakəl anja azlamalika makər*

<sup>6</sup> Kiya uwaga gənənà malika tekula uwana ahoyay la ləv zagəla la abà. Asà à wan kà maz gay marabən gə, uwana adàdza à ahən anja koksikoksi, adàzin à azladza uwaga tasà à uda la azlatsəhay, la azlagay, ngaha tasà à wan la makad gəl à ahən gudən à vok gesina. <sup>7</sup> Malika uwaga abadətàmà la kuda zləkkà, agòđ à atà: “Hòyàw yewdi kà anja Zəzagəla, zləbàw masla kà uwana kaslà uwana adəđah seriya à azladza à gəl kà adaslay. Sləkàwàw masla! A masla uwana adahən zagəla, la kutso la mukwà, ngaha la azlamakakəzay anha gesina.”

<sup>8</sup> Kiya uwaga aya, malika anik anəfà à tsəh à uwaga à uda la magođay: “Babila, mən hud gudən adabəzlba, adabəzlba bərəf, tsewwa! Masla atəpla azladza kà madəh mabila anha,

\* 14:5 14.5 Zakari 3.13

kiya uwaga azladza gesina uwaga tabiy mapak løv aña Zəzagəla à gəl aņatà gesina.”

<sup>9</sup> Kiya uwaga malika mamakər adəvla à tsəh à uda. Uwatà agòđ la kuda zləkkà: “Kəla azlauwana tasləkàw tatagà uwatà asà à uda la iyaw la abà, ŋgaha la maftsa vok aña tatagà uwatà, atà la masəlay aña tatagà la madəgay, baņaw la ahəl aņatà, <sup>10</sup> atà tadàsa ŋgərpa la ahəl aña Zəzagəla. Tetuwa namnamga adəgay la abà đikidiki aw. Azladza uwana tadaday à akəl à abà uwana makodə à ahəŋ gə la huleli, kiya uwanay à uwana tadàsa ŋgərpa la huma azlamalika aña Zəzagəla, ŋgaha la huma aña magadzaw. <sup>11</sup> Tetuwa kəsək aña akəl, uwana adəbabəh azladza uwaga kà, adəkəđ gəl aw, kà uwana tasləkàw mazlazlay la azlatatagà uwaga, ŋgaha atà la masəlay aña la vok aņatà. Kiya uwaga atà tadəbəza maduw løv aw, tadəs ŋgərpa kiya uwanay mavakay la mahənay gesina.”

<sup>12</sup> Kà uwaga akul, uwana kakəsàw gay aña Zəzagəla, dìnàw gəl à Yesu à vok, akul uwana kabasəwwəŋ à vok kà uwana akul, akul azladza aña Zəzagəla.

<sup>13</sup> La lig aña, gətsənà kuda atsən la zagəla, kuda uwaga agòđ à gi: “Tsetsər uwanay: lakana ŋgaha tsəràh à huma à gay, azlauwana tadin gəl à Sufəl Yesu à vok, ŋgaha tamats à abà, atà la uwana Zəzagəla adəpis à atà gay à vok.” “Iyay, kiya uwanay”, Masasəđok tsikasla awulà à uda: “Sləray aņatà kà adadəv à gay, taslala vok aña maduw løv adagay, kà uwana mats à gəl aña sləray aņatà kà adəpəhla vok ala la dazuwaya.”



<sup>14</sup> La abatà gənəṅà tatak anik aya. Gənəṅà habaga medfekuga. Tatak anik la habaga uwatà la afik. Agà bokuba maftsa vok aṅa dza, lakəl aṅha garamusa aṅa sufəl lakəl, uwana maḏehəṅ gà la luwàluwà. Mavaw mazuwayga la ahàl aṅha aya. <sup>15</sup> Kiya uwaga malika anik asà à lag la mənṅ gày Zəzagəla la aku, azalà la ndzəḏa à dza uwana adzà madzay la habaga la afik: “Dahà sləray la mavaw aṅak, tsəḏf tatak, kà uwana sartà aṅa matsəḏf tatak kà adaslay, tatak vəḏfah adahəṅay kà matsəḏfay.” <sup>16</sup> Nṅaha dza uwana agà la habaga la afik azəḅ mavaw, atsəḏf tatak uwana la vəḏfah, atsəḏf gesina.

<sup>17</sup> Nṅaha la abatà gənəṅà malika anik aya, asà à uda la gày Zəzagəla la aku. Masla babay agà la mavaw mazuwayga la ahàl aya.

<sup>18</sup> Malika anik aya asà à waṅ kà la slaka makəḏf tatak. Masla kà mənṅa aṅa akəl, asà à waṅ aṅa mazalay à malika anik uwana mavaw mazuwayga la ahàl, agòḏal: “Zəḅ mavaw aṅak, nṅaha hàḏ, ḏatsəḏf mayyay tatak la abatà, kà uwana tahəṅay.” (Gudəṅ à vok kà guf)

<sup>19</sup> Kiya uwaga malika azəḅ mavaw aṅha, ahàḏ kà matsəḏf tatak uwaga la guf la abà, ahàḏ à slaka uwana takuḏitsàh, afətùkw à abà la abatà. Uwaga gesina apəhla ala kà Zəzagəla adapaka ləv mənṅa. <sup>20</sup> Slaka makuḏitsay kà la lag gudəṅ la uda. Mok uwana adakuḏitsay iyaw gà à uda la abà, iyaw gà uwaga kà aṅiz, la uwana asà à uda, uwaga akəl bokuba mukwà kərkər, nṅaha makəlay aṅha kà bokuba magur mahoḏfay pəlis dzim bəzi aṅha dzik zlo, nṅaha zəṅzəṅ aṅha

kà təzləm dza. Kiya uwaga à uwana Zəzagəla adəkəs azladza makəsaferga uwaga la mapak ləv anha. Tetuwa adəpaka atə ləv à gəl.

## 15

### *Aganay ηgərpa mədəf uwana azlamalika tadədala*

<sup>1</sup> La lig anja uwaga la ahən, gənənən aya magol nadzipo, maval ləv à dza à gay gə la zagəla. Agə la ahən malika mədəf la ηgərpa la ahəl anətə. Uwanay kà madəvla à tsəh anja ηgərpa, kà uwana uwanay bay kà madəvla à tsəh mapak ləv anja Zəzagəla uwana adazinal à gəl.

<sup>2</sup> Kiya uwaga aya gənənə tatak anik, uwana bokuba dərəv, uwana awutsəday bokuba kutərum, uwana la akəl la abə babay. Aya gənənə azladza uwana takədəsl à tatagə uwatə, atə la mazlazlay uwana tafətəl afađ à vok. Atə takweska masəlay anja sləm anha. Atə tatsəzlla à ahən la gay dərəv uwaga la ηiziη la ahəl, uwana Zəzagəla avə à atə. <sup>3</sup> Tahəb mahabay uwana Musa magamza anja Zəzagəla uwana ahabəh uwarə, uwaga kà mahabay anja magadzaw. Tahəb la magodəy:

'Kak Sufəl Zəzagəla gami uwana kakoray lakəl anja tatak gesina,

Sləray anjak uwana kadəhən kə mənğa, dzəba anha səla aw, aduwan gesina.

Kak la uwana Sufəl anja gudən à vok gesina, Koksikoksi kadəhən kə dziriga, kak dziriga gə.

<sup>4</sup> Haday Sufəl, uwana adàhoy yewdi anjak aw kagodf uwa?

Uwa à uwana gəzləb kà aw adàgodfay uwa? Dza tsikaslaga, kà kak tekula pəra.

Azladza gudəŋ à vok gesina tadàsa à waŋ à huma anjak,

Kà mazləb ka, kà uwana azladza gesina tanəŋa uwana kadəhəŋ, kà la tetəvi anha.

✧

<sup>5</sup> La lig anja uwaga la ahəŋ kà, gənəŋà magol gày Zəzagəla la zagəla mapəzlla à ama ala gà. Gày uwatà madəhəŋ gà la lukut, la slaka uwana Zəzagəla agagamahay la azladza. <sup>6</sup> Gənəŋà azlamalika mədəf uwaga, ŋgərpa agà à atà la ahəl, tasà à lag kà la gày Zəzagəla la aku, tatsòkwàh lukut medfekuga à abà kuzlatta, tawəđàh vok ala la slarapay anja luwàluwà. <sup>7</sup> Kiya uwaga tekula la tataka anja azladza ufadf uwaga la abà la sifa, avàh à azlamalika mədəf uwaga tasà luwàluwà mədəf. La azlatasà uwatà la abà mapak ləv anja Zəzagəla adahən à abà. Zəzagəla gami uwana aga la ahəŋ anja koksikoksi, masla la mapak ləv gà lakəl anja azladza. <sup>8</sup> Kəsək atatùkw, ahənà gày ala. Asà à uda la mazləbay anha la abà ŋgaha la maslay anha la abà. Dza aslalà vok anja mad à gày uwatà à agu aw, say ŋgərpa mədəf uwaga la ahəl anja azlamalika adəv à gay dən.

## 16

### *Mapak ləv anja Zəzagəla*

✧ 15:4 15.4 Mahabay 86.9; Yereimiya 10.7

<sup>1</sup> La lig aṅa uwaga la ahəṅ, gətsənà kuda atsən à lag la gày Zəzagəla la aku. Dza uwatà agòd à azlamalika mədəf uwaga: “Dàw kadàsokwahaw mapak ləv aṅa Zəzagəla uwana la azlatasà la abà à vədah. Sòkwàhàw à vədah mədəf nna!”

<sup>2</sup> Kiya uwaga malika matera ahəd, asòkw aṅha à vədah. Azlamagol gorodzu uwana azay tapàhla vok ala, la vok aṅa azladza uwana masəlay aṅa tatagà uwatà aga à atà la vok, atà uwana tasləkàw mazlazlay.

<sup>3</sup> Ngaha aya malika masəla ahəd, asòkw aṅha à dərəv məṅga à abà. Kiya uwaga mukwà uwaga abədfla vok à aṅiz, bokuba uwana atsà à mazimnekid la vok ala. Azlatatak gesina la iyaw uwaga la abà taməts à gay, hənats.

<sup>4</sup> Malika mamakər ahəd, asòkw aṅha à azlamukwà uwana à tsəh takəlay, ṅgaha la azlawana takakiz à uda la kutso la abà; ṅgaha atà babay tapakàh kiya aṅiz. <sup>5</sup> Kiya uwaga gətsənà malika uwana masla məṅga aṅa iyaw agòd: “Kak, uwana kak tsikasla dagay uwarà, ṅgaha kak la ahəṅ la sifa lakana aya. Kak uwana kak la ahəṅ la sifa, kak masla manats seriya ala la tetəvi aṅha, <sup>6</sup> kà uwana azladza uwanay kà tatsàh aṅiz aṅa azladza aṅak à vədah, la aṅa azlaməna mapəh à atà gay à ahəl aṅak, lakana kavà à atà aṅiz kà atà aṅa masay, tabəzà uwana azlayla atà abəzal, suwaṅ.” <sup>7</sup> Ngaha gətsənà kuda atsən la slaka makad tatak, agòd: “Iyay, kak la uwana kak Sufəl aṅa gudəṅ à vok gesina, kadah seriya à azladza kà la tetəvi aṅha, ndzer.”

<sup>8</sup> Kiya uwaga malika maufad asòkw aṅha à afats à adi. Afats adzəkà mavəfay bokuba akəl,

kà uwana aβəzà tetəvi la slaka Zəzagəla kà mavəday, kà maslərnàh azladza ala. <sup>9</sup> Uwana tanəṅəṅ aslərnàhatàla kà, tatsək magodəhay à Zəzagəla à gəl, kà uwana masla la uwana ṅgərpa uwaga la ahəl. Bə la kità bay, takweskà mapəh gay la ləv ala, tamàts à mawisiga aṅatà à abà. Atà tazləbà sləm aṅa Zəzagəla aw.

<sup>10</sup> Kiya uwaga aya malika mazlo asòkw aṅha à kursi aṅa tatagà uwaga à afik. Ṅgaha mələs apakà vok la makoray aṅha. Azladza tadzəkà mapadàh slid, kà maz atà aṅha. <sup>11</sup> Ama atà tapəh gay la ləv ala aw, tadà à huma à gay la madàh mawisiga aṅatà, tatsək magodəhay à Zəzagəla à gəl, kà uwana tasa ṅgərpa məṅga la gorodzu aṅatà la abà.

<sup>12</sup> Kiya uwaga malika maməkwa asòkw aṅha à mukwà məṅga gə à abà, uwana sləm aṅha Efərat. Mukwà agəl ala, kà azlasufəl uwana tasà à afik la mas à afik afats aṅa maguwa à uda la abà la abatà. <sup>13</sup> La lig aṅa uwaga la ahəṅ, gəṅəṅà azlamasasədok mawisiga makər, maftsa vok aṅatà kà bokuba azlagoftok. Tekula asà à uda la huf aṅa kudu, anik aya la huf aṅa tatagà uwatà, ṅgaha mamakər asà à uda la huf aṅa tatagà masla mapəhal gay à ahəl fidaga uwatà. <sup>14</sup> Gesina aṅatà azlamasasədok mawisiga uwaga, taguwà à uda kà la seteni la abà, masla uwana avà à atà ndzəda kà madàh nadzipo anik anik. Tadàh à slaka azlasufəl gudəṅ à vok gesina, kà maham à atà gay à vok, kà atà aṅa mas à waṅ aṅa map guvəl la Zəzagəla, uwana aduwa gesina, la vud uwana adàfəta à maslay aṅha la

ama ala.

<sup>15</sup> “Tṣəbàwwal sləm”, Yesu agòḉ à atà, “Gi la uwaga gədàda à awtày bokuba masla à gəl! Mapis gay à vok agay la dza uwana adza à ahəŋ la adi, la maf sləm à lukut aŋha, kà masla maday la godega deyday la vuḉ mas à waŋ gulo, kà ziruwī aŋa makəsay la huma azladza aw.” <sup>16</sup> Mok uwana azlamasasəḉok uwaga taday, tahama gay azlasufəl à vok, tahamà à atà gay à vok la slaka uwana tazalalla la gay ibəranəŋkowen: *Harmagedon*.

<sup>17</sup> Ngaha la makəḉfal gəl, malika maməḉḉəf asòkw aŋha à afad à abà, ŋgaha kuda atsən la huma kursi aŋa Zəzagəla la magol gày Zəzagəla la aku, agòḉ: “Diga, tsewwa.” <sup>18</sup> Kiya uwaga azlamawutsəḉay tawutsəḉ, azlahabaga tasläh məlo babay. Kutso abəlaka vok mənŋa. Didi didi, dagay uwana Zəzagəla adahà gudəŋ à vok kà, kutso adabəlaka vok kiya uwanay didi aw. <sup>19</sup> Kiya uwaga mənŋ huḉ gudəŋ apəslakähla makə, ŋgaha azlahuḉ gudəŋ, uwana la gudəŋ la vok gesina, tawàslla babay. Katskats awulà à Zəzagəla à gəl, à mawisiga aŋa gudəŋ Babila. Apakà ləv mənŋa lakəl aŋha, la mapak ləv aŋha la abà kà, asà à atà azlamagol ŋgərpa, la magoḉay: “Sàw à gay.” <sup>20</sup> Kiya uwaga dèwdèw bəza gudəŋ uwana iyaw anuḉàhà atà à gay à adi, ŋgaha la azlagudəŋ gesina tazàhàlla tuwiya. <sup>21</sup> Matsatsa iyaw asòkw à ahəŋ kà mənŋa mənŋa, mahanay aŋha kà bokuba nəvol. (Kilo aŋha aslay 40, asal magoḉay tasà hi 20) Atà atəḉ à azladza à gəl. Bə gotənaŋ kà, azladza tapakà ləv lakəl aŋa Zəzagəla, tatsəkəl

magodahay à gəl kà uwana tatərèb la matsatsa iyaw uwaga la abà. Nğərpa uwanay kà aduwà azlaŋərpa anik uwana adada à lig gesina la kaykay.

## 17

### *Aganay gay lakəl aŋa mis masla mazaḅ zil gà*

<sup>1</sup> La lig aŋa uwaga la ahəŋ, malika tekula la tataka azlamalika mədəf uwaga la abà, tasà mədəf la ahəl, asà à waŋ, agòd à gi: “Sà à waŋ, gəpəhakalla kakay à uwana mis masla mazaḅ zilga uwaga adàsa nğərpa mi, mis uwaga kà asal magodəy kà: Hud gudəŋ uwana taŋəl à gay mukwà dəŋ. <sup>2</sup> Kiya uwaga azlasufəl aŋa gudəŋ à vok tadahàhà mabila la masla, nğaha atəpla maḍàh mabila aŋha à azladza la mabiy azladza gudəŋ à vok, nğaha tadà à maḍàh uwaga à abà babay.”

<sup>3</sup> Kiya uwaga Masasəḍok Zəzagəla asà à gəl gulo, nğaha malika uwatà adàla gi à fəta à abà. Mok uwana gi la fəta la abà, gənəŋà mis tekula adadza à tatagà à lig. Tatagà uwatà kà mativga, gəl mədəf la vok, nğaha la dərəw kulo lakəl. Vok aŋha kà tsatsabasla matsetser à ahəl sləm matsəkla magodahay à Zəzagəla à gəl ala à vok. <sup>4</sup> Ama kà aŋa mis uwatà kà, masla atsòkw azlalukut seda mativga vikuzaga à abà. Masla aḅək tatak bəḍà à vok, azlaadaga la azlaluwàluwàga, nğaha la azlaakur uwana sləm aŋatà la ahəŋ, tasà luwàluwà gà la ahəl. Tasà uwatà adahenla la azlatatak vaŋvaŋga, bokuba magodəy kà mabila uwana adahàhəŋ.

<sup>5</sup> La madəgay aṇa mis uwaga kà sləm anik la ahəṇ. Uwaga kà sləm uwana mahad vok à ahəṇ gà. Sləm uwaga tatsetser kà aga: MƏŃ HUD GUDƏŃ BABILA, IYÀ AṆA AZLAMƏNA MAZAB ZIL, ŃGAHA IYÀ AṆA AZLATATAK VANVANĜA MAWISIGA, VANVANĜA UWANA LA GUDƏŃ LA VOK GESINA. <sup>6</sup> Gəṇəṇà mis uwatà kà, aṇiz aṇa azlaməna gay Zəzagəla adawisla gəl à vok. Kà mana takad atà mi kagodaw ay? Kà uwana tazà gay marabəṇ aṇa Yesu.

Uwana gəṇəṇà uwaga kà, ləv avàl à gi à gay. <sup>7</sup> Malika uwatà agòd à gi: “Kà mana ləv avàl à ka gay ma?” Agòd à gi: “Tsənàṇ, gəpəhakala godega aṇa gay mahad vok à ahəṇ gà uwaga, lakəl aṇa mis uwanay kà, ṅgaha lakəl aṇa tatagà uwana mis aga la lig kà, uwaga kà tatagà uwana gəl aṇha mədəf ṅgaha dərew kulo lakəl kà uwaga. <sup>8</sup> Tatagà uwaga kanəṇəṇ kà, agà la sifa uwarà, ama lagwa kà la sifa aya aw. Zewk kà, adàwula à uda la afək zəṇzəṅga uwatà la abà aya. Baṇa adasa à uda kà, Zəzagəla adəkəfay tsokwfasl. La mok uwana Zəzagəla adzəkà maṇal gudəṇ à vok, atsetsèr sləm aṇa azladza uwana tadàbəza sifa à wakità aṇa sifa à abà, ama azladza anik la ahəṇ kà, sləm aṇatà la wakità aṇa sifa la abà aw. La kaslà uwana tadənəṇ tatagà uwaga kà, ləv adàval atà à gay, kà uwana agà la sifa uwarà. Ama lagwa kà la sifa aya aw, ama zewk kà adàwula à uda.”

<sup>9</sup> Kiya uwaga agòd à gi aya: “Kà matsən uwaga kà, say azladza tagay azlamatsihilaga, la haṅkəli. Azlagəl mədəf uwaga kà, apəhla



ala kà azladadəgwal mədəf, uwana mis adza à afik. Uwaga apəhla ala kà azlasufəl mədəf babay. <sup>10</sup> Kiya uwaga azlasufəl mədəf: Azlasufəl zlo kà makoray aṅatà kà adada à lig tsewwa. Maməkwaga aga la sufəl la afik. Ama mamədəf kà, kaslà aṅha adasa à waṅ dadàṅ aw. Baṅa kaslà uwaga adàslay kà, adàzuw sufəl kà, kà aṅa kaslà ṅuv pəra. <sup>11</sup> Tatagà uwaga la aslasl gəl aṅha, uwana agà la sifa uwarà, ṅgaha masla la sifa aya aw. Masla tekula la tataka aṅa azlasufəl mədəf bay, masla adàpakay sufəl mamtəgis. Baṅa adàzlaṅazlay kà, Zəzagəla adəkəday aṅa tetuwa.”

<sup>12</sup> “Kà aṅa azladərew kulo aṅa tatagà uwaga kà, kanəṅaṅ kà, masla apəhla ala kà lakəl aṅa azlasufəl kulo, uwana tadàzlaṅalay, ama tazùw sufəl dadàṅ aw. Ama mok uwana tadàzlaṅalay kà, tadàbəza maslay kà aṅa kaslà ṅuv. <sup>13</sup> Azlasufəl uwaga gesina tadàtsən vok gay. Atà tadàvə ndzəda la maslay aṅatà kà maḍàh sləray à tatagà uwaga, <sup>14</sup> tadàpa guvəl la magadzaw. Masla kà, aduwa atà, kà uwana masla kà Sufəl aṅa azlasufəl. Masla la uwana aduwa azlasufəl gudəṅ à vok gesina, azlaaṅha tanəfay la ləv tekula. Kà uwana masla la uwana atsatsamàni atà ṅgaha azalà atà kà manəfay, kiya uwaga kà tadàduw atà gesina.”

<sup>15</sup> Bà gotənaṅ, malika uwaga agòd à gi: “Dərev uwanay kanəṅaṅ, à uwana mis masla mazab zilga uwaga adza à afik kà, apəhla ala kà azladza tsəhay gay gesina, ṅgaha azlauwana tasà à waṅ la makad gəl à ahəṅ gudəṅ à vok gesina. <sup>16</sup> Azladərew kulo uwaga kanəṅa atà, ṅgaha la

tatagà uwaga la aslasl gəl aṅha la uwana tadàzin vok à mis masla mazaḅ zilga uwaga ala. Tadàhəl tatak à mis uwaga ala, tadàməl à ahəṅ la godega deyday. Matəm à ahəṅ aṅha kà tadàtəl à gay.  
<sup>17</sup> Uwaga kà, kà uwana Zəzagəla aguwà la ləv aṅa azlasufəl kulo uwaga la tsəh, kà madəhəṅ uwana asal. Kiya uwaga kà, tatsənà vok gay, kà madəh sləray la ndzəḍa aṅatà gesina kà aṅa tatagà uwaga. Tatagà uwaga adàkoray tsərəh à uwana à gay aṅa Zəzagəla adàgəḍ à afik.”

<sup>18</sup> “Nḡaha mis uwana kanəṅəṅ kà uwaga kà məṅ gudəṅ, uwana la maslay lakəl aṅa azlasufəl gudəṅ à vok gesina.”

## 18

### *Zəzagəla adukwa seriya à gudəṅ Babila à gəl*

<sup>1</sup> La lig aṅa uwaga la ahəṅ, gənəṅà malika anik atsà à ahəṅ la zagəla. Masla agà la maslay məṅga, azladza gudəṅ à vok gesina tanəṅà uḍaka la mazləḅay aṅha. <sup>2</sup> Masla awiyà la ndzəḍa, agòḍ: “Babila, Babila mabəzl gəl à abà gà, mabəzl gəl à abà gà, bəḍəftal, adàpaka slaka mahad vok à ahəṅ aṅa azlamasasəḍok mawisiga, ḡgaha azlatatak mahoyay tadàdza à ahəṅ la abatà. <sup>3</sup> Babila, ma kà mana abəzl à abà à mi kagəḍaw takay? Kà uwana avà à vok aṅha à mabila la matapla mabila aṅha à azladza. Azlasufəl la gudəṅ la vok tadəhàhà mabila la masla. Azlaməna tsakalay tagəh gorobu kà azlatatak dzəḍa aṅha səla aw gà, uwana la gudəṅ uwaga la abà.”

4 Ngaha gətsənà kuda anik atsən à ahəŋ la zagəla, agòd: “Azladza gulo, sàw à uda. Baŋa kahamaw gay à vok la mawisiga aŋha la abà, akul babay, kadàzlakaw atà à tsəh! 5 Kà uwana tsakana aŋha adanazla tsərəh à zagəla. Ngaha babay kà sləray mawisiga aŋha avika Zəzagəla aw. 6 Dahəwwaləŋ à vok bokuba uwana adəhəkulləŋ à vok suwəŋ. Baŋa agòr à akul mawisiga tasà tekula gòrəwwal à afik tasà səla. 7 Səgəw ŋgərpa aŋha ala kà ləv aŋha mazəŋ; bokuba uwana agà la maslay kà madz à ahəŋ la matsidəy la abà. Masla agòd la gəl aŋha kà: ‘Gi nuha sufəl; awkà: gi mis kudə aw, gi gəsəl mamətsay à gi aw’, agòd. 8 Gay gà la uwaga matərəbay aŋha adəsakanə à wəŋ, kà vud tekula pəra. Duvats, mamətsay ŋgaha may, akəl adəbabəh à gay, kà uwana Sufəl Zəzagəla kà, masla la uwana Sufəl aŋa tatak gesina, masla la uwana adəfahalla seriya à gəl.”✠

9 Kiya uwaga azlasufəl aŋa gudəŋ à vok uwana tafahà mabila la gudəŋ uwaga, mok uwana tadənəŋ kəsək aŋa akəl uwana ababəhay kà, tadətaway la mabək ahəl à kudə, kà uwana tadzà à ahəŋ la matsidəy la abà. 10 Kiya uwaga ŋgərpa aŋa gudəŋ adàvə à atə guba. Kà uwaga tatsàzl à fəta à awtəy la mabək ahəl à gəl la mataway gəd gəd: “Məŋ gudəŋ Babila, kakay la kirim yewdi, seriya adatəf à ka à gəl ma!”

11 Kiya uwaga aga la azlaməna matsakalay la gudəŋ la vok gesina, tataway la mabəkəh ahəl à gəl babay, kà uwana akələdababəh

✠ 18:8 18.8 Yesayya 47.7-9; 48.20; Yeremiya 50.8,29; 51.9

gudəŋ à gay, ŋgaha masukw tatak la ahəŋ aya aw. <sup>12</sup> Aganay azlatatak madaw ala aŋha: Luwàluwà, gursu, azlaakur uwana sləm aŋatà la ahəŋ, kà aŋa madàhla tatak bəðfà, azlaturmi lukut zlazladfaga, azlaseda mativga, ŋgaha la azlatsəhay lukut mahədayga. Ŋgaha aya azlatatak uwana azlaməna tsakalay tadàwàh ala, taga azlatsəhay ahàf anik uwana azinay lela, ŋgaha la azlatatak uwana tadàhàhàŋ la azlaslid gawwan, azlatatak anik bay la azlaahàf mapəday gà delga, azlatatak anik tadàhàhàŋ la azlaada vərzeganiga, ŋgaha la azlaakur miko-slaga. <sup>13</sup> Azladza uwaga tadàwàh azlatsəhay matərsin anik anik ala, ŋgaha azlababasl uwana azinay lela. Tadàwàh ala aya iyaw matavəruk, la azlaamàl, nalkama, la azlapəhaw nalkama, ŋgaha la azlasla, la azlatuwan, la azlapəlis, la azladərkwà uwana azlapəlis tabiyəŋ, ŋgaha la azlamayà tadawah ala; ama masla masukway la ahəŋ aya aw. Kiya uwaga tataw la magodəy à gudəŋ uwatà. Azlaməna matsakalay tagod à məŋ hud gudəŋ uwaga: <sup>14</sup> “Azlatatak uwana kaval à ləv aŋak, akàl adababəh à gay lidfa. Gorobu aŋak, la matsidəy aŋak gesina adazila, kadàbəzal aya aw.” <sup>15</sup> Kiya uwaga azlaməna matsakalay, uwana tagahay gorobu kà masla, ŋgərpa aŋa gudəŋ uwaga adavà à atà guba. Kà uwaga tadatsazl à fəta à awtày la mabak ahàl à gəl la mataway. <sup>16</sup> Tadàwits hulolo gay gədgəgəd: “Məŋ gudəŋ adabəzl à abà. Masla agà bokuba mis uwana atsòkwàh azlaturmi mativga à abà, ŋgaha la azlaseda zlazladfaga, ŋgaha

la azlatsehay anik mahadƣay gà, masla abàk tatak bèdà à vok mənƣa, azlaanik tadƣahahan la luwàluwà, azlaanik la azlaakur uwana sləm anha la ahən. <sup>17</sup> Kay, kakay awma ababèh à gay la gorobu anha la kirim yewdi kiya uwanay ma?”

Azladza uwana tabelàk kəslah iyaw la azlamənƣa anətà, nƣaha la azlaməna matsakalay uwana tauguzahahay la kəslah iyaw, nƣaha kəla dza uwana la kəslah iyaw la afik, tatsàzl à fəta à awtày kərkər gesina. <sup>18</sup> Atà tanərèz mok uwana tanənà kəsək akàl, uwana ababèh gudən, tawiyà la ndzəda: “Tekedik kà gudən anik la ahən, kà anƣa magagazla la masla aw!” <sup>19</sup> Kiya uwaga atà tatàw la mabak ahàl à gəl, tatabàbàlàh la kutso la abà, tawiyà gədfà, tagòd: “Aganay mən gudən uwanay, adabəzl à abà à uwana, azladza uwana takòràh kəslah iyaw gesina tagàh gorobu la ahàl anha. Uwaga adabəzl à abà kà la kirim yewdi!”

<sup>20</sup> Kay, akul azladza uwana la zagəla la afik, rabàw ankul. Akàl adababèh à gay Babila. Akul azladza anƣa Zəzagəla, akul azlaməna matapla, nƣaha akul uwana tapèh à akul gay à ahàl kà mapàh à azladza, rabàw, kà uwana Zəzagəla adadƣahalla seriya à gəl kà tatak uwana adƣahà-kullàn à vok!

<sup>21</sup> Uwana uwaga adada à lig, mən malika anik azèb akur mənƣa bokuba vəl, adùw à dərəv à abà la magodƣay: “Kiya uwanay à uwana tadàdƣuw mən gudən Babila ala la ndzəda, adàzila tuwiz, dza adənənənən aya dƣikidiki aw.

<sup>22</sup> Mahohumay anƣa azlanəziŋla dəs, la azlaməna

mats talakway, la azlamazlazliṅ adàtsanay la abà aya aw. Tadàbèza azlamèna maḍàh azlatatak anik anik la abà aya aw. Bamèraka matsènay aṅa madzam tatak, babay adàmatsah à gay gesina hènats. <sup>23</sup> La abatà uḍaka aṅa azlafènəs adàgahay la abà aya aw. Mawiyay mazaḅ mis la maḍàh zil adàtsanay la abà aya aw. ‘Gi, zlà’, kagòḍ, la maḍuw azlagudəṅ à vok gesina la matsakalay, ṅgaha kà vavaraha azladza à bada à abà la mēzla aṅak. Kà uwaga à uwana seriya adàkəs ka!”

<sup>24</sup> “Zəzagəla anəṅà aṅiz aṅa azlamèna mapəh à atà gay à ahàl aṅha, ṅgaha la aṅa azlamèna maḍiṅal gəl à vok, uwana takàḍàh atà la gudəṅ la vok gesina, agà la kuda aṅha. Kiya uwaga à uwana Zəzagəla adadukwla seriya à gəl suwaṅ”, malika agòḍ.

## 19

<sup>1</sup> La lig aṅa uwaga la ahəṅ, gətsənà kuda atsən à ahəṅ la zagəla bokuba kuda aṅa maham à ahəṅ dza, tagòḍay: “Məzləḅa Zəzagəla! Məta-taslla ahàl à Zəzagəla gami, masla la uwana atəfà azladza. Mazləḅay la maslay gesina kà la ahàl aṅha. <sup>2</sup> Iyay, masla la uwana, masla seriya dziriga gà, adàh seriya à azladza la asik aṅha. Adukw seriya à masla mazaḅ zil uwaga à gəl, masla uwana awisà azladza gudəṅ à vok ala la sləray mawisiga aṅha. Zəzagəla adavàl ṅgərpa, kà uwana akàḍal azlamayà aṅha.” <sup>3</sup> ṅgaha tagòḍ aya: “Məzləḅa Zəzagəla! Kəsək aṅha adəv à gay tsərəh à awtày aw!”

<sup>4</sup> Kiya uwaga azlamadzahaga dzik sèla gəl aṅha ufaɗ uwatà, ṅgaha la azlatatak ufaɗ uwatà la sifa, takədèd à ahəṅ la huma Zəzagəla uwana aga la kursi la afik, tasləkàw Zəzagəla tagòɗ: “Məzləba Zəzagəla! Amen!”

*Madəvaday mazəb mis aṅa magadzaw aṅa Zəzagəla*

<sup>5</sup> Kiya uwaga kuda atsən à uda la kursi Sufəl la abà agòɗ: “Zləbàw Zəzagəla gami, akul azlamayà aṅha; azlaməṅga gà, ṅgaha la azlabəzaga gesina, akul uwana kahoyaw yewdi aṅha!” <sup>6</sup> ṅgaha kiya uwaga gətsənà kuda atsən bokuba mavats gay aṅa maham à ahəṅ dza. Atsən babay bokuba mahohumay aṅa iyaw mukwà. ṅgaha aya bokuba mahohumay aṅa habaga uwana asläh mèlo à uwana gətsənàṅ. Matsənay aṅa kuda gà uwana kà, agòɗ kà: “Məzləbà Zəzagəla, kà uwana Sufəl Zəzagəla gami kà, adazuw Sufəl ala aṅa tetuwa. <sup>7</sup> Məràb la marabay, kà uwana kaslà aṅa mazəb mis aṅa magadzaw kà adaslay, ṅgaha mawɗa aṅha adafah vok. <sup>8</sup> Tavà tetəvi à mis kà matsokw à lukut tsifaṅaga à abà, uwana awutsəɗay wuzlwawuzl.” (Lukut delga uwaga kà, asal mapəhla ala kà, magay sətaka aṅa azlauwana tafà gəl aṅatà à Yesu à afik)

<sup>9</sup> Kiya uwaga malika anik agòɗ à gi: “Tsetsèr à wakità à abà: Marabay agay la dza uwana Zəzagəla azalàl à madəvaday aṅa mazəb mis aṅa magadzaw à abà.” Bà gotənaṅ malika uwaga agòɗ à gi aya: “Azlagay uwanay kà, taga dzirga, kà uwana tasa à waṅ kà la paṅaw

aṇa Zəzagəla.” <sup>10</sup> Kiya uwaga mok uwana gətsənà uwaga, gətəd̄ à makəla asik aṇha, kà masləkaway, ama agòd̄ à gi: “Kad̄ahəṇ kiya uwaga aw, gi bay kà, gi mayà aṇa Zəzagəla bokuba kak la azladeda aṇak uwana tadiṇ gəl à gay uwana à vok, Yesu afətətàla à adi ala. Kà aṇa uwaga kà, kazləb̄a gi aw, zləb̄a kà Zəzagəla!”

Azlaməna mapəh à atà gay à ahəl tapəh slilih aṇa gay uwana Yesu afətətàla à adi ala bay, kà uwaga la uwana avəh à atà ndzəf̄a.

### *Masla mad à pəlis medəkuga à afik*

<sup>11</sup> Kiya uwaga gənəṇà zagəla, kà zagəla mapəzlla à ama ala gə, ṇgaha pəlis medəkuga azlaṇəl. Dza uwana la afik kà sləm aṇha kà Dziriga, kà uwana adəhahəṇ kà say dziriga. Apa guvəl la tetəvi aṇha.✧ <sup>12</sup> Yewdi aṇha kà awutsəf̄ay bokuba aləh akəl, garamusa kà dəṇ la gəl la kəl. Matsetser à ahəl sləm à vok gə, dza la ahəṇ asəl sləm uwatà aw, say masla pəra. <sup>13</sup> Atsòkw à lukut uwana à vok aṇiz aṇiz gə. Sləm aṇha kà: Gay aṇa Zəzagəla. <sup>14</sup> Azlamalika aṇa guvəl aṇuvaw tanəf̄a masla, gesina aṇatà la pəlis medəkuga la afik, tatsòkwəh azlalukut medəkuga à abà koha babay. <sup>15</sup> Katsakar mazuwayga asà à waṇ la gay aṇha la awtəy. Adàkadla azladza uwana tavələhà atà à ahəṇ lakəl à adi. Adakor atà la agəla ada. Adàhabahatàla bokuba mayyay ahəf̄ uwana takud̄its iyaw à uda la abà. Kiya uwaga à uwana adəpəhla à atà ala, kà Zəzagəla la mapak ləv mən̄ga. <sup>16</sup> La lukut aṇha

✧ **19:11** 19.11 Mahabay 96.13; Yesayya 11.4; Hezəkiyel 1.1



lavok, ɲgaha la matataba aɲha kà tatsetsèr slòm aɲha à abatà: ‘Kà Sufəl aɲa azlasufəl, Məɲga uwana aduwa azlaməɲga anik gesina aya.’

<sup>17</sup> ɲgaha aya gətsənà malika anik uwana atsizilla à afats à afik azalahay la kuda zləkkà, agòd: “Azlakolan, azlakolan uwana tahoyay la ləv zagəla la abà, sàw à waɲ gesina kazuwaw madəvaday məɲga uwanay Zəzagəla adafaha-kulan à ahəɲ. <sup>18</sup> Sàw à waɲ, kazuwaw sləb vok aɲa azlasufəl, zùwàw babay aɲa azlaməna guvəl la azlaməɲga aɲatà, zùwàw aɲa azlapəlis la azlaməna madàh à afik, ɲgaha la aɲa azladza gesina, azlamayà la azlauwana takor gəl, baməraka azlamagolga la azlabəzaga, zùwàw à gay gesina!”, agòd à atà.

<sup>19</sup> Kiya uwaga gənəɲà tatagà uwatà la mokfak mawurlaga la vok, ɲgaha la azlasufəl gudəɲ à vok, tahamà gay à vok kà map guvəl la masla mad à pəlis medfekuga uwatà à afik, ɲgaha la azlaməna guvəl aɲha. <sup>20</sup> La lig la ahəɲ, katskats, takès tatagà uwaga, ɲgaha la tatagà masəla fidaga, uwana adfahàhà azlanadzipo la masəlay aɲa tatagà matera. Apapàt atà aɲa mabəz masəlay la vok aɲatà uwana tasləkaw la mazlazlay, uwana la maftsa vok aɲa matera. Kiya uwaga, mok uwana takès tatagà uwaga la masla fida uwaga, tawits atà à gudùh akəl, uwana à abà madəhəɲ à abà gà la huleli la adi. <sup>21</sup> Ama azlaməna guvəl aɲha, uwana la pəlis la afik kà, akəd à gay la katsakar uwana asà à waɲ la gay aɲha. Azlakolan gesina tadəv à waɲ, tazùw.

## 20

### *Gay aña mavay dëbow*

<sup>1</sup> Kiya uwaga gënëña aya malika anik atsà à ahëñ la zagëla la tsëkurëm aña afëk zëñzënga, la magol mazakazak tadzëbërri la ahàl. <sup>2</sup> Ahàd, akës kudu, uwana uwarà kà bebi uwana arahëlla azladza à uda. Masla la uwana baba aña masasëdok mawisiga, ñgaha slëm aña anik aya kà seteni. Malika uwaga akës atsërkwàñ aña mavay dëbow. <sup>3</sup> Uwana malika adatsërkwëñ, adùw masla à afëk zëñzënga à abà, atsàkalla à ama la tsëkurëm, ñgaha aslëràbal à tsëh tsëràh à mavay dëbow, kà masla aña maràhla azladza gudëñ à vok à uda aya aw. Say baña mavay uwaga tafàl à ahëñ, adàdëv à gay. La abatà tadàpëlëñ ala aña kaslà ñuv aya.

<sup>4</sup> La lig aña uwaga la ahëñ, gënëña azlakursi sufël. Azladza uwana tadzàh madzay la afik, tabëzà maslay la slaka Zëzagëla kà madfàh seriya. Gënëña babay sifa aña azladza uwana tanàtsàh à atà gël la vok ala uwarà, kà gay dziriga aña Yesu uwana tagadfàñ à afik, ñgaha la uwana tazàñ gay Zëzagëla aya. Atà taslëkàw tatagà uwaga amiyaka bà la maftsa vok aña bay aw, ñgaha atà takës masëlay aña tatagà kà manàh à madëgay bañaw ahàl aña atà aw. Tadz à ahëñ la Yesu lagwa takoray la slaka gà la masla tsëràh à mavay dëbow. <sup>5</sup> Aganay azladza teraña uwana tawul à uda la mamëtsay. (Ama azlaanik uwanay kà tadawul à uda dadàñ aw, say baña mavay dëbow uwanay adaslay) <sup>6</sup> Gay gà la uwaga marabay agay la azladza uwana tawula

à uda teraᅇa. Atà Zəzagəla adapis à atà gay à vok kaykay. Ndzəda aᅇa mamətsay masəla la ahəᅇ lakəl aᅇatà aya aw, atà tadəgah azlaməna mav tatak la huma Zəzagəla la Yesu. Tadəkoraᅇ la Kristu mavay dəbow.

### *Zəzagəla aduwaᅇ seteni*

<sup>7</sup> La mavay dəbow uwaga la abà, seteni kà matsərkwəᅇga la mazakazak. Baᅇa uwaga adàda à lig kà tadəpələᅇ ala aya. <sup>8</sup> Adada à marahàhla azladza anik anik à uda la gudəᅇ la vok gesina. Sləm aᅇa azlagudəᅇ uwaga kà Gog atà la Magog. Masla adàhama à atà gay à vok kà map guvəl la Zəzagəla tadəgay kà aᅇuvaw bokuba wuyyaᅇ uwana la mukwà la tsəh. <sup>9</sup> Aganay tazlaᅇalay tasləh gəl à ahəᅇ, tadàh à slaka gesina, takas gay à slaka maham à ahəᅇ aᅇa azlaməna gay Zəzagəla à adi, ᅇgaha la huđ gudəᅇ uwana Zəzagəla awoyaᅇ bay. Mok uwana takəs atà gay à adi, akàl asa à ahəᅇ la zagəla, ababəh atà à gay. <sup>10</sup> Seteni uwana azàhàtala kà, takəs, taduw à gudùh à abà la masla mapəhal gay à ahəl fidaga uwatà. Tadàsa ᅇgəᅇpa mavakay la mahəᅇay la abà la abatà aᅇa tsəràh à awtəy.

### *Seriya makəđ gəl à ahəᅇ*

<sup>11</sup> ᅇgaha aya gəᅇᅇᅇà kursi sufəl medfekuga, dza la afik, dzəgova. Gudəᅇ à vok la zagəla tazàlla à huma ala tuwiz, manəᅇ atà la ahəᅇ aya aw tetuwa. <sup>12</sup> ᅇgaha aya kà, gəᅇᅇᅇà azlauwana tamàtsàh gesina, azlamagolga la azlabəzaga, atà tatsàzl à huma kursi aᅇa Zəzagəla. La abatà

azlawakitä mapazl vok gä la ahəŋ, la azlawakitä uwatä la abä, ä uwana tatssetsèràh madehəŋ aŋa azladza ä abä tadza ä ahəŋ la sifa aŋa tsèràh. Mok uwana tapəzlay wakitä, Zəzagəla adfahä seriya ä azladza uwana ä gəl tamätsäh uwarä. Adfahä atä seriya la tetəvi aŋha, kalkal bokuba uwana tadfahähəŋ ä uwana tatssetsèr ä wakitä uwaga ä abä. <sup>13</sup> Baməraka azlauwana tazäh ä iyaw ä abä la azlatsəhay anik anik kà Zəzagəla adawulla atä ä uda gesina, kà madäh ä atä seriya kalkal la uwana tadfahähəŋ suwaŋ. <sup>14</sup> Ndzəfa aŋa mamətsay la mezewi adagay la ahəŋ aya aw, kà uwana taga la gudüh akäl la abä. Uwaga slaka mamətsay masəla. <sup>15</sup> Baŋa dza uwana sləm aŋha matsetserayga la wakitä aŋa sifa la afik aw kà, tadəduw ä gudüh akäl ä abä, aŋa tetuwa bay.

## 21

### *Zagəla mawga la gudəŋ ä vok mawga*

<sup>1</sup> Kiya uwaga la lig la ahəŋ, gənəŋä zagəla mawga la gudəŋ ä vok mawga. Zagəla maviyaga la gudəŋ ä vok maviyaga adada ä lig, ŋgaha azladərəv la ahəŋ aya aw. <sup>2</sup> Ŋgaha gənəŋä huđ gudəŋ tsikasläga, huđ gudəŋ uwatä kà maw Urusalima, uwana atsä ä ahəŋ la zagəla la slaka Zəzagəla, atsä ä vəfah. Zəzagəla adadafahalla vok ä uda bokuba dugu uwana adäh vok kà mad ä zil. <sup>3</sup> Ŋgaha aya gətsənä kuda atsən la ndzəfa la kursi sufəl la abä, agòđ: “Nəŋəŋ Zəzagəla adəŋal gəy aŋha ä tataka azladza ä abä, adədzä ä ahəŋ la tataka aŋatä la abä, tadəgay azladza aŋha. Zəzagəla la gəl aŋha adəgay

la atà. <sup>4</sup> Masla adàcfahah à atà iyaw tugwi la adi ala gesina. Mamətsay adàgay la ahəŋ aya aw, matuway la mabak ahəl à kudfa adàgay la ahəŋ aya aw, mazay adàgay la ahəŋ aya aw, matərəbay adàgay la ahəŋ aya aw, gesina kà tsewwa adagay, kà uwana azlatatak maviyaga kà adada à lig!”

<sup>5</sup> Dza uwaga la kursi la afik agòd: “Nəŋəŋ, gəpakà azlatatak gesina ala kà mawga!” Nğaha agòd à gi: “Tsetsèr uwanay gəpəh à ka, kà uwana azlagay uwanay kà dziriga, fida la tsəh aw.” <sup>6</sup> Agòd à gi aya: “Tsewwa adagay. Gi la uwana gi matera aŋa tatak gesina, nğaha gi la uwana gi makəđ gəl à ahəŋ aŋa tatak gesina aya. Gi uwana gədzəkà tatak, nğaha gi uwana gədəkəđ gəl à tatak gesina. Azladza uwana nəlay aza à atà, gədətəđ à atà iyaw deyday. Iyaw uwaga kà iyaw uwana avà sifa.✧ <sup>7</sup> Aganay azlatatak uwana gədàvə azladza uwana takəđàsl à mawisiga, gədàgay Zəzagəla aŋatà, nğaha atà tadàgay azladza gulo. <sup>8</sup> Ama azladza uwana tasakal à tsəh ala, la azladza uwana tadiŋ gəl à Yesu à vok aw, la azlaməna ləv mawisiga, la azlaməna makəđ dza, la azlaməna mabila, la azlaməna madàh məzla, la azlaməna manəf mazlazlay, la azlaməna fida kà, tadàwits atà à gudùh akəl uwana à abà madəhəŋ à abà gə la huleli. Uwaga la uwana agay mamətsay masəla.”

### *Urusalima mawga aŋa Zəzagəla✧*

9 Kiya uwaga malika anik asà à slaka gulo. Agà tekula la tataka azlamalika mœdœf uwana la abà la tasà la ahàl uwana azlangørpa makœd gøl à ahøj agàh la abà. Mœk uwana adasa à waŋ agòd à gi: “Sà à waŋ, gœpœhakala dahalay uwana magadzaw adazœbay tsi.” 10 La kirim yewdi, Masasœdœk Zœzagœla asà à ahøj à gøl gulo, ŋgaha malika uwaga adàla à gi à møj gudøj matsœkakaœdayga à afik. Apœhgœla Urusalima huœd gudøj tsikaslaga aŋa Zœzagœla la zagœla la slaka Zœzagœla. 11 Gudøj uwatà awutsœdœfay wuzlwawuzl bokuba akur uwana slœm aŋha yaspe, slœm aŋha la ahøj kà møjga gà. Awutsœdœfay bokuba takenedeka. Uwaga kà mazlœbay aŋa Zœzagœla la uwana awutsœdœfay kiya uwaga. 12 Gudøj uwaga zlagam møjga, zinjzinja anuœfa ala gay à adi dœkœts, gamagày kulo gøl aŋha sœla la vok. La kœla gamagày kulo gøl aŋha sœla uwaga kà tatsetsèràh slœm aŋa tsœhay kulo gøl aŋha sœla aŋa azla Isœrayel à adi. 13 Kœla makœla tekula kà, gamagày makœr makœr la vok. Makœr la mas à afik afats, makœr la matœd à ahøj afats, makœr la gøl la aku, ŋgaha makœr la tsœh la ahøj, bokuba magoœday magadzaw. 14 Tafà zlagam uwaga kà à azlaakur matatukw gày kulo gøl aŋha sœla à afik. La kœla akur la adi tatsetsèràh slœm aŋa azlamœna matapla la slaka aŋa Yesu à adi.

15 Malika uwana atùgw à gi gay uwaga kà, agà la agœla luwàluwà la ahàl, uwaga kà agœla kà magorla tatak. Ahàd kà magor gudøj, la azlagamagày, ŋgaha la zlagam aŋha. 16 Huœd

gudəŋ uwaga kà, agà banuga kiya uwaga gay ufaɗ nna kà kalkal gesina. Malika agùr gudəŋ uwaga la agəla aŋha: Ziŋziŋ aŋha kà, agà zuwiɗ slewzi dəbow la dadərmokw səla, kəla gay tekula, kiya uwaga gay ufaɗ nna à ziŋziŋ aŋha bay. <sup>17</sup> La lig la ahəŋ malika agùr zlagam aŋha mawalay dzim la dzik ufaɗ gəl aŋha ufaɗ. Magur aŋha kà bokuba uwana anu azladza məgur tatak. <sup>18</sup> Zlagam gə, uwana kà tahàzl la tsəhay akur uwana tazalalla yaspe. Ama kà aŋa huɗ gudəŋ kà taŋəl kà la luwàluwà dzəraŋ dzadzəraŋ bokuba takenedeka medekuga. <sup>19</sup> Azlaakur matatukw zlagam kà la luwàluwà tafahàhəŋ, kà la azlaakur anik anik mahadəyga. Akur teraŋa uwana taŋəlal zlagam à gəl kà tazalalla kà yaspe, masəla kà safir, maməkər kà agat, maufaɗ kà emerod, <sup>20</sup> mazlo kà sardonikəs, maməkwa kà saruwan, mamədəf kà kərisolit, mamtəgis kà beril, maladəga kà topas, makulo kà kərisopəras, makulo gəl aŋha tekula kà tiwrkəs, ŋgaha makulo gəl aŋha səla kà amətəs. <sup>21</sup> Kà aŋa gamagəy kulo gəl aŋha səla uwaga kà, kəla gamagəy kà, tafahəŋ kà la Perle, uwaga kà bokuba kololo, tetəvi aŋa huɗ gudəŋ kà tafal kà luwàluwà dzəraŋ dzadzəraŋa bokuba takenedeka medekuga.

<sup>22</sup> La huɗ gudəŋ uwaga kà gəy Zəzagəla la ahəŋ aw, kà uwana Zəzagəla la gəl aŋha abəd à abà, atà la magadzaw. <sup>23</sup> Kiya uwaga gənəŋà afats atà la təla tawudəy aya aw, kà uwana azlaka dza aya aw. Kà uwana la abatà kà, mazləbay aŋa Zəzagəla awudəy ŋgaha magadzaw avədəy kiya fənəs la huɗ gudəŋ la abà.

<sup>24</sup> Azladza gudəŋ à vok gesina tadàuguzahahay la ufaka aŋha la abà. Kikay kà ufaka uwaga, azlasufəl aŋa gudəŋ à vok tadàda à abà kà mav maslay aŋatà gesina à Zəzagəla. <sup>25</sup> Azlagamagày aŋa huɗ gudəŋ tadàdza à ahəŋ mapazl vok gà kəla mavakay gesina. Matsakalla à ama la ahəŋ aw tsərəh à awtày, kà uwana wəɗ adàgay la ahəŋ aya aw. <sup>26</sup> Kiya uwaga tadàsahla maslay aŋatà à waŋ azlatatak zəbzəbga, zəbzəbga uwana la gudəŋ la vok. Tadàdalla uwaga à slaka Zəzagəla kà mavàl. <sup>27</sup> Ama kà aŋa tatak mawisiga kà, adàda à gudəŋ uwaga à abà aw. Azladza uwana àläh àlähga, la azlaməna fida tadàda à abà aw. Say azladza uwana tatsetsər sləm aŋatà à wakità aŋa magadzaw à afik pəra, la uwana tadàdza à ahəŋ la sifa aŋa tsərəh à awtày.

## 22

<sup>1</sup> Malika apəhgəla mukwà iyaw uwana avà sifa à azladza aya. Awuɗay dzəraŋa tsərəh à godega bokuba tekeneɗeka meɗekuga, akəl à uda la kursi aŋa Zəzagəla la abà, la aŋa magadzaw. <sup>2</sup> Masla akəlay la ləv barama aŋa huɗ gudəŋ uwaga la ama. Ama ahàf uwana avà sifa à azladza dzərra la gay mokmak nna, avà mayyay kəla təla asik tekula, bokuba magoɗay asik kulo gəl aŋha səla la mavay la tsəh. Amiyaka babasl aŋha bay kà, yohof kà mawar azladza gudəŋ à vok ala gesina. <sup>3</sup> Ama uwana Zəzagəla adàtsafla gesina kà adàbəza vok la abà aw.

Say kursi aŋa Zəzagəla la aŋa magadzaw pəra uwana tadàgay la huɗ gudəŋ uwaga la abà, la azlaməna sləray aŋatà kà masləkaway.



4 Tadànəŋ huɗ adi aŋha, tadàtsetserah sləm aŋha à madəgay aŋatà. <sup>5</sup> Kiya uwaga vəd adàgay la ahəŋ aya aw, azlafənəs, la afats adàzlaka azladza aya aw. Kà uwana Sufəl Zəzagəla la gəl aŋha adàv uɗaka. Atà tadàkoray aŋa tsərəh à awtày.

*Mas à waŋ aŋa Yesu*

<sup>6</sup> Kiya uwaga malika agòɗ à gi: “Gay uwanay kà dziriga, fida la abà aw. Sufəl Zəzagəla uwana avà Masasəɗok aŋha à azlaməna mapəh à atà gay à ahəl kà mapàh à azladza, asləl malika aŋha à ahəŋ kà mapəhla ala uwana adàpaka vok la huma à gay à azlamagamza aŋha.”

<sup>7</sup> Yesu agòɗ: “Nekwa, gəwula à waŋ. Marabay agay la azladza uwana takəs gay uwana la wakità uwanay la abà, kà uwana Zəzagəla la uwana afətalla à ama ala la Masasəɗok aŋha!”

<sup>8</sup> Gi Yuhana gətsənà azlatatak uwaga la sləm gulo, ŋgaha gənəŋəŋ uwaga gesina la yewdi gulo. Mok uwana gəɗatsən uwaga gesina la manəŋəŋ, gəkəɗɛɗ à makəla asik aŋa malika, uwana apəhgəla uwaga gesina, kà masləkaway.

<sup>9</sup> Ama agòɗ à gi: “Kadahaŋ kiya uwanay aw. Gi bay, gi magamza aŋa Zəzagəla, bokuba kak, ŋgaha la azladza aŋak uwana Zəzagəla apəh à atà gay ahəl la azlauwana tanəfa gay aŋa wakità uwanay. Kà aŋa uwaga kà, kazləba gi aw, zləbà kà Zəzagəla!” <sup>10</sup> Kiya uwaga agòɗ à gi aya: “Zəzagəla afətàka à ama ala à uwana tatsetsər à wakità uwanay à abà. Kakəsa gay uwanay la ləv aŋak pəra aw, kà uwana kaslā aŋa azlatatak uwanay kà nekwa. <sup>11</sup> Gəgòɗ à azlaməna maɗàh

mawisiga, gəgod à azlaməna ləv mawisiga kà banja asa à akul magay kiya uwaga kà: ‘Dàw à huma à gay la ləv mawisiga pəra zlà.’ Kà aña dza dziriga bay kà, ada à huma à gay la maďàh dziriga aña, dza uwana sətaka, ada à huma la sətaka aña gesina.”

<sup>12</sup> Kiya uwaga Yesu agòd: “Digiya tsənàwàñ, nekwa gəwul à wañ. Gi gədàsəlla azlatatak à wañ la ahəl, kà gi aña mapəl masik aña à dza. <sup>13</sup> Gi uwana gi la ahəñ dagay uwarà, ñgaha gi uwana gədàgay la ahəñ aya. Gi uwana gədzəkà tatak, ñgaha gi uwana gədàkəđ gəl à tatak gesina.”✧

<sup>14</sup> Marabay agay la azladza uwana tapalàh lukut aña, atà la uwana la tetəvi aña maday à huđ gudəñ à abà. Atà la uwana azlawla atà, kà mazuw mayyay ahàf, uwana avà sifa à azladza. <sup>15</sup> Ama azlaməna falay, la azlaməzla, la azlaməna maďàh mabila kà, tadàgəđ à uda. Azlaməna makađ dza babay, la azlauwana tasləkaw mazlazlay, la azlaməna manəf fida kà, tadàgəđ à uda babay, tetuwa tadàbək asik à huđ gudəñ à abà aw!

<sup>16</sup> Yesu agòd: “Gi, Yesu uwana gəsləl à akul malika gulo à wañ kà maz à akul tatak uwanay gesina la azlagəy maham à ahəñ məna gay Zəzagəla la aku, gi kà, gi dza uwana kakudaw. Gi mayyi à tsəh ala aña David. Gi ñuzla gəl bebəñ.”✧

<sup>17</sup> Masasəđok Zəzagəla, la mawəda aña magadzaw takəs la azlaahəl səla: “Sà à wañ zlà!”

---

✧ **22:13** 22.13 Yesayya 40.10; 44.6; 48.12; 62.11 ✧ **22:16** 22.16 Yesayya 11.1,10

Akul uwana katsənwaw gay uwanay babay: “Sà à waŋ!”, kagodaw. Dza uwana nəlay azəŋ kà, asa à waŋ, abəzà iyaw sifa uwanay deyday.\*

*Makəð gəl à ahəŋ aŋa gay uwanay*

<sup>18</sup> Gi Yuhana gəsləhakulla sləm ala. Akul gesina uwana katsəbàw sləm à gay uwanay la wakità la abà, asà à waŋ la slaka Zəzagəla. Gi gəpəh à akul kà, baŋa dza akəðəvànì gay à wakità uwanay à tsəh kà, Zəzagəla adàzala ŋgərpa à gəl suwaŋ, à uwana masla apəh la wakità uwanay la abà. <sup>19</sup> Ngaha bay, baŋa dza atetuwa uwana Zəzagəla afətàla à ama ala la wakità uwanay la abà kà, Zəzagəla adàzəbal aŋa ala humà mayyay ahəf uwana avà sifa, ŋgaha la humà huɸ gudəŋ tsikaslaga uwanay, wakità uwana adapəhla ala.

<sup>20</sup> Masla sayda dziriga aŋa gay uwana la wakità uwanay la abà, agod: “Ndzer, gi nekwa, gəwula à waŋ.”

'A tsa bà kità! Sà à waŋ, Sufəl Yesu!'

<sup>21</sup> Sufəl Yesu apis à akul gay à vok kaykay gesina. Amen.

---

\* **22:17** 22.17 Yesayya 55.1

**Wakità Zəzagəla Wakitə Anja Makəs Vok  
Slawda Mawga (Cameroun)  
Matal: Wakitə Zəzagəla Wakitə Anja Makəs Vok  
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 13 Jul 2024 from source files  
dated 29 Jan 2022

03efbf2f-98ca-5534-8610-0be3a8c4b974